

أَوَّلُ كِتَابٍ سَيَاخِرٍ فِي أُصُولِ التَّرْبِيَةِ
عَنْ الأَبْنَاءِ وَالأَبَاءِ

بَابَا يَا عَيْل

A.M.

ليخرب طاهر




الناشر
مكتبة زهور الشرق
١١٦ شارع محمد فريد - القاهرة
تليفاكس: ٢٣٩١٣٣٥٤ (٠٠٢٠٢)

Monday
20/7/2015
Riyadh

أول كتاب ساخر في أصول التربية
عن الأبناء والآباء

بابايا عيبا

د. عبد طاهر



الناشر
مكتبة زهر الشرق
شارع محمد فريد - القاهرة
تليفاكس: ٣٣٤١٣٣٥٤ (٠٠٢٠٤)

الناشر
مكتبة زهر الشرق



١١٦ شارع محمد فريد - القاهرة
تليفاكس: ٣٣٤١٣٣٥٤ (٠٠٢٠٤)



EA

مكتبة جرائير
JARIR BOOKSTORE
SR 19

الرياض
16-7-2015
29 Ramadan

الرحمة
والله
عظيم

أول كتاب ساخر في أصول التربية عن الأبناء والآباء

بابا يا عيل

الشيخ محمد بن عبد الله

مكتبة نورا الشرق

الإهداء

إلى الآباء جميعًا

والأبناء أيضًا

إلى مازن حبيب قلب بابا

إيهاب ظاهر

- ٨١ أنا عايز أنام في الوسط
- ٨٧ الفلكه يا جابر
- ٩٥ أسم النبي حارسه وصاينه
- ١٠٥ أنا جيت منين يت بابا؟ «وجبوب منع البيض»
- ١١٥ يا رب التلفزيون يفرقع في وشكم
- أمك مين يا ولا؟ أنت ابن مين؟ ابن نفيسه؟ ولا ابن زينات؟
- ١٢١ ولا ابن جمالات؟
- إذا كان رب البيت بالدف ضارب فشيمة أهل البيت الرقص
- ١٢٩ والطرب
- ١٣٣ بابا... يا عيل
- ١٣٧ مذكرات رئيس جمهورية عن ابته وكيف كان يتعامل معه ...
- ١٤٧ إن شاء الله لأ
- ١٦٣ بحب في .. وما بحبش مفيش
- ١٨١ أعمال المؤلف

أنت كسرتها يا فنيد؟



كل راجل فينا مهما كبر، دايمًا حيفضل جواه طفل صغير، عندنا مثل عامى، مصرى بيقول: «يا مكبركم يا مصغركم» وده معناه أن الواحد كل ما تقدم به العمر، يرجع طفل صغير، لحنينه لأيام الطفولة جايز، لحرمانه من أنه ما عاشى طفولته ممكن، لخبه للأطفال وارد، وده بيظهر فى حاجات كتيره بتمر علينا فى حياتنا اليومية، أنا أعرف أب عنده أربعين سنة، كل ما يروح يشتري لعبة لطفل من أطفاله؛ تعجبه لعبة يشتريها لنفسه، ماينساش نفسه فى حالة تسوقه لعب للأطفال، يا ترى نفسر حالته دى بأيه؟ يا ترى هى حالة طبيعية؟ يا ترى حالة مرضية؟ الأكيد أنها ذات دلالة، ومرجوع وهى حرمانه من اللعب وهو صغير، أو عدم تمكن أهله من شرائها له، لضيق ذات اليد، أو لعدم معرفه الأهل أن اللعبة عند الطفل شىء هام، وحيوى، وضرورى، وأنها بتنمى تفكيره وعقله. فيه أهالى كتير لما أبنيهم بيطلب منهم لعبة معينة، وتكون ظروفهم على قدمهم يقولوا له: أحنا حناأكلك، ونلبسك، ولّا حنجيب لك لعب؟ كفاية علينا أكلك، ولبسك، وشربك؛ هم من منطلق تفكيرهم شايفين أن اللعبة ليست ذات أهمية، أو جدوى، وأن الأفضل ما يضحوش بفلوسهم القليلة فيها؛ وخاصة أنهم بيكونوا واثقين أن بعد فترة قليلة، الطفل ده حيكسر اللعبة دى، وحتضيع فلوسها على الأرض، وتلاقى الأم من دول بتوبخ أبنيها، وتعنفه وتقول

له: مش كنا جنبالك بتمن اللعبة دي حاجة تاكلها؛ تمرى على جسمك، بدل اللعبة اللي أنت كسرتها دي.. والأم تفضل تلوم فى نفسها، وتعاتب وتأنب نفسها؛ أنها وافقت الطفل، وهاودته، وراحت أشرت له لعبة، ما عدتش ساعة إلا لما كسرها، وتنوح، ويمكن كمان تزغده، أو تضربه، أو تحرقه بالشمعة، وتعنفه بغيظ، وغل كل ده وهى حزينه على الكام جنيه اللي دفعتهم فى اللعبة؛ ده غير أنها حتفضل تقول، وتعيد، وتزيد، اصلك ما تعرفش أحنا بتتعب قد أيه؟ عقبال ما نجيب لك الفلوس دي، أبوك شقيان بيهم طول النهار، صبح وليل، وأنت حضرتك تكسر اللعبة؛ كان علينا بأيه أننا نجيبها من أساسه؟ أنا كنت أتخبطت فى عقلى لما طاواعتك وجيبتها لك؟ هو زك، وعياطك، اللي خلانى أجيبها؛ توبة من دي النوبة؛ لو طاواعتك تانى، لو شوفتك قدامى بتفرفر، وبتطلع فى الروح على لعبة بنص جنبه، مش حشترها لك يا خايب، يا أهبل. والواد يتعقد، ويكره اللعبة، ويتغاض من أمه، اللي بدل ما تطبط عليه، وتاخذ بخاطره على كسر لعبته، تشيل وتنكت فيه. ده فكر ناس بعينهم، وتصرف أم حيال لعبة هى اشترتها لابنها؛ وما احسنش هو التعامل، والتصرف معاها؛ فأنكسرت وحزنت الأم على فلوسها.

واحد تانى ميسور الحال، ابنه طلب منه لعبه، مها كان ثمنها بىروح يشترها له على طول، من غير تفكير، ابنه كمان ماكدبش خبر، خمس دقائق بالتمام، والكمال، وكان حاططها تحت رجليه .. أمه تيجى تزعق له.. الأب يشخط فيها، ويقول لها: سيبه يكسر، وأنا اشتريله غيرها،

هو أحنا بنشقى، ونتعب ليه؟ مش علشان عيالنا، ويطبطب على الواد، ويقول له: كسر يا أبني كسر، ولا يهملك بكرة يكون عندك، غيرها، وأحسن منها كمان، وفعلاً بكرة بيجى، وتكون فى حجر الواد نفس اللعبة، اللي مش بعيد أنه برضك يكسرها؛ ما خلاص عرف ان كل ما لعبته حتنكسر؛ أبوه حيحيب له غيرها، ومش حيحافظ على لعبة أبداً، وكل شىء حيبقى عنده سهل؛ طالما فيه اللي بيطبطب عليه بعد الغلط، ويهاوده. عيل تانى محروم، مايبقاش أهله قادرين يشتروا له لعبة؛ بيفضل يبص على الولاد الصغيرين؛ اللي ما سكين لعب فى أيديهم، وفى عينه حسره، وفى نفسه وجع؛ وبيقول من جواه: يا رتنى كنت مكانهم، أوزيهم، وبتفضل معاه عقدة لحد ما يكبر، وعمره ما يقدر ينسى حرمانه من اللعبة دى وهو صغير أبداً، ولو طال يشتريها وهو كبير، حيشترها.

أم سلاكة وأبو رجب مسلوخة



الكتاب ده مش كتاب تربوى؛ لأنى مش متخصص فى أصول التربية، لأسباب كتيره، أولها: أنى مش دارس ليها، وثانيها: أن أنا أصلاً مش متربى، أو تقدرُوا تقولوا علياً أنى ناقص رباية، ماتضحكوش أوى كده؛ الاعتراف بالحق فضيلة. تقدرُوا تقولوا أنى أتربيت، بس أتربيت غلط، زيى زى ناس، ورجالة كتير أوى؛ بتطلع تلاقى يا أبوها شديد فى معاملته، وقاسى، كل حياته شخط، وضرب، وإهانة، وتوبيخ، وتقريظ، وشد ودان، وضرب ع القفا؛ يا أما بتلاقى أبوها طيب أوى، وزيادة عن اللزوم. كمان، ما بيقولش لعيل من عياله ده غلط، وده صح، وده عيب، مش بيعاقبهم على أخطاءهم، سايب لهم السايب فى السايب.

وكل ما عيل من ولاده يعمل حاجة غلط يقول: وماله ما حدش يكلمه، عيل وغلط، وكلنا كنا عيال زيه بالضبط، ويا ما غلطنا، وبكره يتعلم.

أهو ده بقى الغلط بعينه؛ لأنه أبنة كده عمره ما حيتعلم بكره؛ لأن أبوه ما علمهوش، وما وجهوش صح، وما نصحهوش، وما عاقبهوش.

ده حتبقى كل حاجة عنده سهلة، مش حيعرف يعنى أيه صح، ويعنى أيه غلط، مش حيعرف يعنى أيه عقاب، ويعنى أيه ثواب.

ولما يدخل المدرسة حيكرها؛ لأنه حيرفض العقاب من المدرسين لما

يغلط؛ لأن أبوه في البيت ما عاقبهوش، ولا أمه كمان عاقبته، وحتبتدى المشاكل تكثر، وتظهر، وتبان.

كلنا كنا كده؛ يا أما كان أبونا شديد، وكبتنا، وقمعنا، وحرماننا من حنانه، وحسسنا أن الحياة كلها «فرمانات»، وأوامر، ونواهي؛ يا أما كان أبونا «هلهلى» راجل هلهلى؛ وعلى نياته، طيب، وساب لنا السايب في السايب؛ لحد ما فلت عيارنا.

وقليل منا اللي طلع لقي أبوه واعى، يعنى أيه إبوّه، ويعنى أيه تربية طفل، تربية سليمة.

كلنا كنا عايشين بالبركة، أحنا مجتمع أغلبه أميين، ومعظمنا تعليمه متوسط؛ وحتى اللي تعليمهم على، الحياة بتلهيهم بمشاغلها، ومشاكلها، وأعباءها؛ وبينسوا أولادهم، ولما تسأل واحد فيهم أنت عملت أيه لعيالك أو لأولادك؟ يرد ويقول لك: أنا شقيان علشانهم، وشغال ليل نهار؛ علشان أحقق لهم مستوى معيشى محترم، وما احرمهمش من حاجة؛ رغم إنه بالشكل ده حيكون حرمهم من أهم حاجة، وكل حاجة، وهى وجوده معاهم، وأندماجه معاهم، والأولاد مش محتاجين فلوس وبس؛ لأن الفلوس مش حتحقق لهم أكثر من الرعاية؛ لكن التربية، حاجة تانية خالص، التربية يعنى صح، وغلط، يعنى حلال، وحرام، يعنى الواجب، والمفروض، واللى ليك، واللى عليك، وإزاي تتعامل مع الناس، ومع الحياة، ومع المشاكل .. دى التربية. وفرق كبير بين الرعاية والتربية. أنا

واحد من الناس طلعت لقيت أبويا أكبر منى بأكثر من ٤٥ سنة، وده
 طبعا فرق كبير بين أب وأبنة، كنت دائما لما كبرت بحس أنه جدى مش
 أبويا، وبينى وبينه أب مفقود، رغم حنانه، وطيبته، عمره ما عرفنى أيه
 الصبح، وأيه الغلط، عمره ما أتناقش معايا؛ رغم أن المناقشة بين الأب
 وأبنة ضرورية، عمره ما سألنى أنت بتفكر أزاى؟ أو بتفكر فى أيه؟ أو
 سألنى نفسك تطلع أيه لما تكبر؟ كان كل دوره فى حياتى إنه يشتغل،
 ويدينى فلوس وبس، مش أكثر من كده، وعلى طول مسافر، وبينزل لنا
 أجازات قصيرة، يا دوبك يشوفنا ونشوفه، ويرجع يسافر من تانى، صعبه
 الحياة كده. مش كده؟

وربنا رزقنى بأم، ست بيت، طيبة نوعا ما، كل اللي كان طالع عليها،
 كلمة ذاكر، وانجح، ذاكر وانجح، وتأكل فيا، وتعلم فيا، وبس. عمرها
 ما سألتنى برضه نفسك فى ايه؟ أو عاوز أيه؟ هى ما كانتش عايزه غير
 أنى اذاكر، وانجح وبس؛ علشان الراجل المسافر ده، اللي هو أبويا يحس
 بنجاحى، ويعرف أنها ربتنا كويس، أنا وأخويا.

ما سألتنيش مرة واحده أنت بتفرج على أيه فى التلفزيون؟ وناكت
 عنيك فيه كدة ليه؟

ناس كانت عايشة وبس، اه كانت بتصلى الفرض بفرضه، وبتصوم
 رمضان، واتنين وخميس؛ لكن كانت بتسبنى براحتى، أصلى، ما أصلش،
 أصوم، ما أصومش؛ هى نصيحة لا أكثر، ولا أقل من كده، صلى علشان

ربنا يرضى عنك؛ وده مش صح، لا توجيه، ولا أرشاد، ولا أى حاجة
أبدأ.

وفيه منى كثير، واسخم منى كمان، أنا علمت نفسى بنفسى، وربيت
نفسى بنفسى، لكن فيه زيى كثير أنحرفوا، وماعرفوش يعملوا زيى،
ولسة النمط ده موجود، لحد النهاردة، مفيش شىء غيره.

الأبن مسئوليه، وهديه من عند ربنا؛ لازم الواحد يرهاها، ويحافظ
عليها، ويربيها، ويطلعها إنسان صالح، ينفع نفسه، وينفع مجتمعه،
ويرضى ربه، ويكسب دنيته، واخرته.

ظهرت كتب كتيره، فى الفترة الأخيرة، عن أصول التربية لكن لمن؟
وكام أب، وكام أم؟ اللي بيروحوا المكتبة؛ علشان يشتروا كتاب «كيف
تربى طفلك»، أو كتاب «أسلوب التربية الحديثة»، أو كتاب «كيف
تكون أب مثالى»، أو كتاب «كيف تكونى أم مثالية»، أحنا مش مجتمع
متحضّر للدرجة دى، كل أب يربى أبنه بالقدرة، وبالبركة، وزى ما
هو أتربى بالضبط، وده أكبر الغلط، وكل أم بتربى أبنها زى ما أمها
ربتها برضه بالضبط، بالتهشيك، والحواديت، حواديت أبو الزبعبع،
وأم سلاكه، وأبو رجل مسلوخة.

ولما يغلط تقول له: «أحنا حنحطك فى أوضه الفيران»، و«أغسل
أيدك علشان الشامة ماتشمكش، بالليل وأنت نايم»، وأغنية «خد
البذه وأسكت خد البذه ونام» و«كل الأكل كله» ماتسيبش منه

ولا لقمه علشان اللقمة دي ماتجريش وراك يوم القيامة؛ بقى ده كلام؟!
ولآ دي أصول تربية؟!؟

والأب يقول للواد: تف على عمك، تف على خالك، اشتم جدك،
ويفرح الأب أوى، لما الواد يتف على عمه، أو يشتم خاله، أو جده.
ويمسكه من «بلبله» ويقول له: أيه ده؟ الواد يضحك، ويقول
لأبوه: «ده بلبل» أو دي «حمامه»، والأب يفرح بأبنه، ويشيله يبوسه،
وكله في «الهجايس».

بقى ده تربية قويمه، صحيحة، في مجتمع مسلم، شرقى؟

أساليب كثير غلط بنعملها، أو بيعملها كل أب، وكل أم بتلقائية،
وهما غير مدركين إنها بتأثر على الأبن، وسلوكه في المستقبل، وإنهم كده
بيأذوه، وبيأذوا بالتالى حفيدهم؛ لأن الأبن حيعمل نفس اللى أبوه كان
يعمله معاه، مع أبنه مستقبلاً.

أنا كتبت الكتاب ده .. وأنا ناوى مسبقاً أنى أكتبه بشكل تانى، غير
الكتب الموجودة في المكتبات، وحتكلم فيه بالبلدى، بالعامية، للناس
البيسطة، الناس ولاد البلد، حوزيهم همه بيعملوا أيه مع ولادهم،
وبيرتكبوا أى جرم في تربيتهم لأطفالهم.

أنا صحيح باحث في العلاقات الإنسانية، والاجتماعية لكن؛ مش
متخصص في أساليب التربية؛ بس بعرف أيه الصح، وأيّه الغلط.

بعرّف أتعامل مع الأطفال، بألف لهم حوادث، مفيدة، وهادفة،
ولها مغزى، وكمّان بحبهم؛ واللى يحب حد يقدر يآثر فيه، ويقدر يساعده؛
يمكن مش همه اللى حيقروا كتابى ده، والمساعدة مش حتيجى مباشرة
منى أنا؛ لكن كل أب حيقرى كتابى، حياثر فى أبنه؛ لو سمع كلامى ده
كويس، وأستوعبه، وعمل به؛ وكده يبقى أنا خدمت أطفال كثير، وأباء
كثير، والله المستعان.

يمكن لأنى كاتب ساخر، فده حيضطرنى، أنى أتناول بعض
الموضوعات بشكل كوميدى، ساخر شويه، وده أنا شايفه ميزة مش
عيب؛ علشان كلامى مايقاش دمه ثقيل، على اللى حيقروا الكتاب، مش
حيكون نظام إرشادات، ونواهى، وأوامر، ونصايح، مش خطوات،
حاجة كدة (فانى)، ودمها خفيف.

وبالهننا والشفنا

الصفحة البيضاء



وكالة الكتب

أبنك بيتولد زى الصفحة البيضاء، نقيه، وطاهرة، وشفافة، بيبقى عامل زى حته السفنجة، اللي من السهل إنها تشرب أى سائل، وتحتزنه بداخلها، أو فيها؛ أنت لازم تحافظ على الصفحة البيضاء دي، وعلى كل نقطة حبر، حتنزله عليها، ولازم يكون لنقطة الحبر دي معنى، ما تشخبطوش فيها وخلاص.

وخاصة فى السنين الأولى من عمره، والمثل بيقول: «التعليم فى الصغر كالنقش فى الحجر» يعنى بيفضل طول العمر محفور جواهرهم.

لازم تعلمه الصح م الغلط، ولازم تعلمه أن فيه ثواب على الحسنات، وفيه عقاب ع السيئات؛ لازم تعرفه يعنى أيه خير؟ وتفهمه يعنى أيه شر، لازم تعرفه ازاي يكون بنى آدم، إنسان، يحس بالناس، وبالأهم، وازاي يلتمس لهم الاعذار؛ ازاي يفرق بين الصح والغلط.

لازم يعرف أن فيه ربنا، وحيحاسبنا على أعمالنا يوم القيامة، لازم يعرف تعاليم دينه، لازم يصلى من صغره، ويصوم.

أوعى تقول ده طفل، حتى الأطفال لازم يتعلموا.

كل اللي حتكتبه فى الصفحة البيضاء دي؛ حتلاقيه بعد كدة، فى سنين عمره، وعمرك اللي جاي؛ لو زرعت فيه حب الخير، والنضافة، والنظام،

وعدم الإهمال، والالتزام، وعرفته الصبح م الغلط؛ مش حتتعب معاه في
مرحلة مراهقته، ولا كمان وهو شاب؛ الطفل في سنينه الأولى، بيبقى زى
قطعة الصلصال، عجينة طرية، ممكن تشكلها زى ما أنت عايز؛ ومش
معنى كدة أنه ما يكونش له رأى! أنت عليك تعرفه الصبح م الغلط، وبعد
كده هو بنفسه حىختار، ويحدد بنفسه هو عايز ايه؟ وايه الصالح ليه؟

فاهم يا عم الأب، ولأ نقول كمان؟

نقول كمان؟ طيب خليك معايا، وأقلب الصفحة.

قدوة ومثلك أعلى..
«عن شابه أباه فما ظلم»



عندنا في مصر مثل يقول «من شابه أباه فما ظلم» في الغالب الأبن
 بيطلع لأبوه، بيثبه أبوه؛ مش شرط الشبه يكون في الشكل، والملامح، لأ..
 الشكل من جوه، هو ده اللي المثل بيقصده، الأخلاق، السلوك، والتعامل.
 لو أنت صوتك عالي في البيت، أبنك حيطلع صوته عالي زيك
 بالضبط، مش كل واحد فينا، أو مش كل طفل بيطلع يلاقى أبوه إنسان
 سوى، محترم، أو متعلم، واعى.

فيه طفل بيطلع يلاقى أبوه صنايعي، سوقى، ما بيقرقش بين
 ألفاظه؛ اللي بيستعملها في الورشة، أو المصنع، أو الشارع؛ وألفاظه اللي
 بيستعملها في البيت، مع أهل بيته، ممكن الأب «يشخر»، ويزعق، ويسب
 الدين، ويشتم، ويقول: أصل الواد ابن «كذا» عمل كذا النهاردة؛ والواد
 ابن ستين «كلب» عمل كذا؛ دى حاجة «خره»، وعيشة تقرف.

ولما يجي يتكلم مع مراته، قدام عياله، يزغدها في كتفها، ويقول لها:
 أنت يا وليه قومي، فزى، حضريلى العشا، واتلحلى، ماتبقيش قاعدة
 كدة زى الزكية.

طيب أنتم منتظرين أيه من ابن لقي أبوه، بيتكلم بالطريقة دى مع
 أمه؟ يطلع يتكلم مع مراته بلطف، ورقة؟ ولا يكلمها زى ما أبوه كان
 بيكلم أمه؟

حيطلع محافظ على لسانه، في بيته مع ولاده؟ ولا حيتفوه بنفس
الألفاظ، اللي أبوه كان بيتكلم بيها؟

كده بقى عادى أن الولد يشتم، ويسب الدين، ويشخُر، ويقول «ألفاظ
بذيئه».

لو الابن طلع لقي أبوه بيدخن قدامه حيقول: الرجولة إني أمسك
سيجارة، وفي أول فرصة، حيحاول يثبت لنفسه، ولأصحابه إنه راجل،
وحيحاول يدخن، زى أبوه بالضبط.

لو أبوه كان بيسكر في البيت! لما يكبر، الواد حيسكر زى أبوه بالضبط.

دايمًا الأبناء بيكونوا عاملين زى كاميرات المراقبة، لأهاليهم
بالضبط، وأجهزة التسجيل، والرادارات؛ بيلتقطوا كل صورة قدامهم
لأبائهم، ويسجلوا كل كلمة، وكل لفظ، أحنا لازم ناخذ بالناس من
الموضوع ده، ما ينفعش نشتم قدامهم، ولا نتفوه بألفاظ نابيه، وبذيئه،
لأنهم حيقلدوننا، وزى ما حنعمل حيعملوا.

ما ينفعش الأب يناقش مشاكلة مع الأم، في وجود الأطفال، لازم
الأطفال يشعروا بالأمان في البيت؛ وأن فيه تفاهم متواجد، بين الأب والأم.
ما ينفعش الأب والأم يتناقشوا حتى في مصاريف البيت، قدام
الأطفال.

ما ينفعش الأب يضرب مراته قدام أطفالها، ولا حتى من وراهم؛

لأن أسلوب الضرب، مش أسلوب حضارى، ولا إنسانى، وما ينفعش برضه أنه يحضنها، أو يبوسها قدامهم، وخاصة لو همَّه لسه صغيرين. حاجات كثير ما ينفعش إنها تتعمل قدام الأطفال، ولما نقول كده للأباء، والأمهات، يردوا علينا ويقولوا: هو ايه الحكاية؟ هى العيال اللي حتربيننا؟ ولَّا أحنا اللي حتربى العيال؟ القضية مش مين يربى مين، القضية هى الصح والغلط، وما يصح، وما لا يصح.

فيه اللي ينفع إنه يتعمل قدام الأطفال، وفيه اللي ما ينفعش، فيه اللي يجوز، وفيه اللي ما يجوزش.

أبنك حته منك، صورة منك، ماتزعلش منه إنه طلع شبهك، أو أنه قللك.

لو أنت كويس، وسوى، وملتزم، هو كمان حيكون كده؛ ولو أنت العكس؛ هو بالضرورة حيطلع كده، وساعتها ماتلمهوش هو؛ لوم نفسك أنت؛ لأنك أذيتته، وأنت اللي طلعتته بالشكل ده، ووصلته للصورة دى، اللي هو أصبح عليها.. ابنك مش غلطان، أنت اللي الغلط راكبك، من فوقك لتحتك، ومن ساسك لراسك، فهمت يا عم الأب.

ولَّا لسه ما فهمتش؟

ولَّا نقول كمان؟

نقول كمان، وخليها علينا، اياك تقدروا.

أسرة مع بعضنا



الطفل لازم يحس بالأمان فى بيته، لازم يحس بالدفا، لازم يحس أن أبوه، وأمه هما الحماية له؛ هما اللى يقدر يلجأ لهم لو خاف، أو تعب، أو أحتاج للحنان، علشان كده لازم البيت يكون دافى، وهادى، وما فيهوش أى مشاكل، ولا مشاحنات، ولا شجار بين الأب، والأم.

لازم يكون فيه تفاهم، بين الأب والأم؛ وتكون المعاملة بينهم معاملة حسنة، يعنى ما ينفعش الأب - زى ما قولنا - يشتم الأم أمام أبنائه، ولا حتى يهينها، وما ينفعش الأم تعلّى صوتها على الأب، أمام أبنائه، لازم يكون فيه إحترام متبادل، بين الطرفين، علشان ده بينعكس على الأطفال، ونفسيتهم.

ما ينفعش الأب يقول للأم: عليًا الطلاق بالتلاتة، لو ما عملتى مثلاً حلة محشى النهاردة، لأكون راميكى فى الشارع، أو يقول لها: عليًا الحرام، لو ما لميتى نفسك، ومسكتى أيدك فى المصاريف، لأبعثك تأنسى أمك وأبوك، أو يقول لها: لو عملتى كذا، حدّيكى بالجزمه القديمة، يا بنت الصرمه.

أو يقول لها: دى كانت جوازة هباب، وطين، وهى ترد عليه، وتقول له: أنا عارفة أن أيامك سودة، وأن أياسى معاك زفت.

أو تقول له: ده كان يوم أسود، يوم ما أتجوزتك، أو كان يوم

ماطلعتلهوش شمس، وهو يقول لها: دى كانت جوازة الشوم، والندامة، وأنا كان فىن عقلى يوم ما أتهببت وأتجوزتك؟ منه لله اللى عرفنى عليكى، كان يوم شؤم؛ يوم ما وقعتى فى طريقى. بقى ده ينفع؟ أو ده يصح؟ كده الأبناء حينوا صورة سيئة جدًّا عن الزواج، والأسرة، وحيبقى انطباع انطبع جواهم؛ من صغرهم، أن ده شكل كل البيوت، ودى حياة كل الأزواج؛ ولما حد يسأل الولد، ويقول له: أنت حتتجوز مين لما تكبر؟ يرد الولد، ويقول: أنا مش حتجوز حد، أنا مش عايز أتجوز واحدة تتخانق معايا كل شوية، أو واحدة تدعى عليا؛ ما هو الولد معذور، بيسمع أمه وهى بتدعى على أبوه، سواء فى وجوده، أو فى عدم وجوده.

أمهات كثير، مابتقدرش تشتم الأب فى وجوده، وبتنتهز فرصة خروجه من البيت، وتقعده تعييط، أو ماتعيطش - مش شرط إنها تعيط - وتقعده تسب، وتلعن فيه، وتشتم شتيمه من نوعية: روح يا بعيد، إلهى عربية تقطعك بره، أو إلهى سواق أعمى، أو محشش بالقرش كله، يدهسك، ويريجنى منك، أو مصيبة تاخذك، وماشوفش وشك العكر ده تانى، أو يا رب يجيولى خبرك من بره، أو يجوا شايلىنك على نقالة. وطبعًا الأم مابتاخذش بالها من وجود الأطفال؛ اللى سامعين كل الشتايم، والسباب، والدعوات دى على أبوهم؛ ساعتها الأطفال بتحتار، يا ترى أبوهم وحش، زى أمهم مابتقول؟ ويستاهل كل الشتائم دى، والدعوات دى عليه؟ وأمهم مجنى عليها، ولآهى اللى أم مفترية، وهو اللى مظلوم معاها؟ بيحصل تخبط هنا، والأطفال بتحتار بين الأب

والام، وكل ده بيؤثر على نفسيتهم، وحياتهم لما بيكبروا، وما بيحسوش بالأمان أبداً، وبيحسوا أن البيت ده ممكن يتهد في أى لحظة، وما يلاقوش أبوهم معاهم، أو العكس، وبين يوم وليلة ما يلاقوش أمهم معاهم؛ ويبقوا مش عارفين يدّوا مشاعرهم لين؟ ويكونوا مع مين، ضد مين؟ ويتعقدوا من الجواز، والعلاقة الجميلة، والرابط الأسرى، اللى الله سبحانه وتعالى أوجده للمودة، والرحمة، وبقاء النوع، والمصيبة بقى لو الأم شكّاية، وكانت بتستنى جاريتها لما تدخل لها، وتقعده تحكى لها، وتعيد، وتزيد، ده جوزى عمل كذا، وكذا، وجوزى سوى كذا، وتقعده تدعى عليه، وتشتتم عليه؛ وممكن كمان تحكيها أدق التفاصيل؛ اللى من المفروض إنها ماتطلعش بره؛ والأطفال يحسوا انه شىء عادى؛ أن الواحدة تحكى لأى حد، عن اللى بيحصل فى بيتها، بينها وبين جوزها، وهمّه يعملوا كده كمان لما يكبروا؛ ده إذا ما أخذوش موقف من الزواج، من أصله، وكل ده بيترتب عليه أثار نفسيه، وفسولوجية عند الأطفال، منها قضم الأظافر، والتأتأة، والتلعثم فى الكلام، والتبول اللا اردي، والفرع، والصراخ ليلاً، والخوف من الظلام، وفى المدرسة: عدم القدرة على التحصيل، والشرود الذهني، وعدم الإحساس بالأمان، والدفء الأسرى. ينفع كده؟ بقى دى أصول تربية؟ المشاكل لازم تتحل، بعيد عن الأطفال، ولازم يكون فيه نوع من التحكم فى الانفعالات، وعدم إظهار عدم الرضا أمامهم، لازم الأم تحسّن صورة الأب، أمام أطفاله، ولو بالكذب، والمفروض إنها ماتحكىش أسرار البيت، لا لجارتها؛

ولا لقرايبها، ولازم تحاول تحل كل مشاكلها مع الأب، بشيء من الحكمة، والعقل، وما ينفعش إنها تشتم الأب، أو تدعى عليه، لا في وجوده، ولا في غيابه؛ وخاصة أمام أطفاله، وما ينفعش الأب يهدد الأم بالطلاق، وخراب البيت، وتشريد الأسرة، قدام أطفاله.

افهموني بقى.. لازم يكون بين الأب، والأم شيء من الاحترام، وخاصة أمام الأبناء؛ علشان الابن يطلع يحترم مراته، والبنت تطلع تحترم جوزها؛ مش تشتمه، وتدعى عليه، أو تشخر له، وهو يديها بالجزمة، قدام عيالها، ويشدّها من هدومها، وشعرها، ويرميها على السلام، بهدوم البيت، ويقفل الباب في وشها.

مش كده ولا أيه؟

ومش معنى كده أن الأب يكتم مشاعره، تجاه الأم- المشاعر السلبية- والأم تعمل نفس الشيء، حتى لو عملوا كده، أكيد نظرات عندهم حتفضحهم، وحيبصوا لبعض بحقد، وغل، وكره، وده، الأطفال حياحظوه كويس؛ لأن نظرة الحب بتبقى واضحة في عين المحب، ونظرة الغل، والكره، برضه يتبقى واضحة. الأولاد حيفهموا، والحب مايبستخبّاش، والكره أيضًا مايبستخبّاش، بلاش الأباء، والأمهات يوصلوا للمرحلة دي، لازم يجلّوا مشاكلهم بهدوء، وتروى مع بعض؛ علشان الأطفال مايشوفوش في عيونهم، إلا نظرات الحب، والمودة، والاحترام.

الحياة تعاون .. والناس لبعضها



لازم الأب يعرف أولاده، إن الحياة تعاون، وإن كل الناس، في أي تجمع، سواء صغير، أو كبير؛ لازم تتعاون مع بعض، ويساعدوا بعض؛ ماينفعش كل حاجة يقوم بها فرد لوحده؛ مهما كانت مهام، وقدرات الفرد ده.

لازم الأب يحاول يساعد الأم، في البيت؛ مش بمعنى إنه يغسل معاها طبعًا، أو ياخذ معاها الغسيل «فومين»، أو ينشر لها الغسيل على الحبل، وجارتها تقف تتفرج عليه، وتضحك، ويهز نفسه، ويبقى لبانه في بوء جارتها، أو يقف يطبخ معاها، ويقشر البصل، ويخرطه، ويفصص التوم، ويخرط الملوخية، أو يمسح لها الشقة بالخيشة، وهو مشمر بنطلونه؛ كده حيصغر في نظر أولاده، أو يقف يغسل لها المواعين، وهو لابس مريلة المطبخ. فيه حاجات تانية، ممكن الأب يساعد فيها الأم، ومش حتقلل من شأنه، ولا تمس رجولته، ممكن هو يتناول منها الأطباق، ويحطها على السفرة، أو يعمل لها طبق سلاطة، أو يعمل لها دورق عصير - شفشق عصير يعني - للى مايعرفش يعني أيه دورق.

التعاون مش إنك تنضف؛ لأ .. التعاون ممكن يكون في إنك ماتوسخش، ماتهملش، ماترميش ورقة على الأرض، ولو شربت في كوباية، ماتسيبهاش مكان ما شربت؛ شىء بسيط، وسهل إنك تدخلها

المطبخ، وماتدخلش بالجزمة، وهى متوسخة الشقه، ومتربة من الشارع، وتدوس بيها على السجاد النضيف، اللي هى تعبت فى نضافته، وتحاول دايماً تحافظ على كل شىء، وتخلّيه نضيف، كده أنت حتكون متعاون، وبتساعد زوجتك، أو أمك فى البيت، وماتزودش الطينة بله، وتزود عليها الحمل، أشياء بسيطة، ممكن حضرتك تعملها، وتساعد بيها، ليه ماتعملهاش؟ لازم الطفل يتعلم يساعد والديه فى البيت؛ علشان لما يخرج من البيت، يساعد زميله، وأصدقائه فى المدرسة، وفى الشارع، ويعرف إن الحياة تعاون؛ وإنه مش عيب إنه يحافظ على نظافة المكان، اللي هو عايش فيه، يعلق هدومه فى مكانها، ويحط كتبه فى مكانها؛ مش يدخل من بره، يرمى الجزمة بتاعته، فرده فى ناحية، وفرده فى ناحية، ويرمى هدومه على الأرض! لازم يتعلم النظافة، والنظام من صغره، وعدم الإهمال، والتسيب. على فكرة ممكن الزوج لو نظره كويس؛ يساعد مراته؛ فى إنه ينقى لها الرز، وما يصدقش المثل اللي بيقول: «لو الراجل نقى الرز لمراته تسكعه على أفاه حماته» عادى، يعمل هو الشاى، عادى، لكن مش ممكن يخرط لها الملوخية، أو يقوّر لها البنجان، أو يلمع لها جزمته.

الدرسة .. أبتزجج على دو .. رى .. فى



المدرسة.. تقدر تقول اللى أنت بتبنيه فى سنة؛ ممكن يتهد فى يوم، مع أبناك اللى بيدخل مدرسة، وبيقضى فيها كل يوم، ساعات طويلة، مع أطفال فى مثل عمره؛ أنت ما تعرفش عن سلوكهم حاجه، ولا تعرف نوع تربيتهم، ولا همه ولاد مين؟ ولا بيثتهم الاجتماعية شكلها ايه؟ يعنى بترمى صفحتك البيضاء، الجميلة، اللى أنت شكلت فيها حروف، وجمل مفيدة؛ لا يادى تانية، غير واعية، تشخبط، وتلخبط فيها؛ زى ما هى عايزه، وهنا حيحى دورك الأكبر، ما هو مش معقول ابناك ما يروحش المدرسة! لازم يروح، ويعيش، ويتعايش، ويقابل أنماط مختلفة، ويشوف، ويتعلم، وأنت عليك تتابعه، وتسأله كل يوم، شوفت ايه؟ واتعلمت ايه؟ ومين زمايلك؟ وبتعملوا ايه فى الفصل؟ وفى الفسحة بتصرفوا ازاى؟ وبتسمع ايه منهم؟ لازم تعرفه إن فيه أولاد عليه تجنبهم، وولاد عليه مصاحبتهم، لازم تعرفه إنه ما ينفعش يكذب عليك، وأى حاجة يسمعها يحى يقول لك عليها، على طول، ويسألك فيها؛ حتى لو كان شايف إنها محرجة، وقليلة الأدب، أنت لازم توجهه، وتقول له: ده صح، وده غلط، وتروح تسأل عليه فى المدرسة، وتشوف مستواه التحصيلي؛ سيبك من الشهادة، اللى أنت بتمضيها، كل شهر مش هى المقياس، المقياس إيجابيته، فى الفصل، ودرجة استيعابه لدروسه، وقوة تركيزه، واندماجه مع باقى المجموعة، وتقبله لهم؛ حاول تسمع منه كل شىء، وأى شىء، وفهمه

أن الأخلاق الحميدة بتخلّى الطفل محبوب، من الناس، وان الأخلاق السيئة، الكريمة؛ بتجعل الناس تنفر منه.

ساعات الأطفال بيكرهوا المدرسة، لازم انت تدور على أسباب الكره دي، وتعرف هي ايه؟ وليه؟ وتحاول تحلها، فيه أطفال بيكرهوا المدرسة، بسبب المدرسين، والمدرسات؛ لما بيكونوا على درجة كبيرة من الغلاظة، والسماجة، والفجاجة، مش كل المدرسين تربويين؛ فيه مدرس بيكره الطفل في العلم، وتحصيله، وفي المدرسة كمان، بمعاملته السيئة، وعدم استيعابه لنفسية التلاميذ، أو لتوبيخه ليهم دايماً، أو تريقته عليهم، أو اضطهادهم، أو معاقبتهم بالضرب دايماً، أو عدم تمهله، وصبره عليهم، في درجة استيعابهم، فيه مدرس بيرهق التلاميذ بكثرة الواجبات المنزلية.

وفيه مدرس ما بيراعيش ضميره، في الشرح، وبيشرح دون أن يتتبه للتلاميذ دول، ويقول يا ترى فهموا ولا ما فهموش؟ وفيه مدرس ما بيحاولش يبسط شرحه للتلاميذ؛ وعلشان كده لازم، وبالتالي حيكرهوه، ويكرهوا المدرسة، ويحاولوا يتحججوا بأى حجة؛ علشان ما يروحوهاش، والحجج حتكون بالتمارض، أو باختراع كذبه، ولتكن الكذبه: النهاردة عندنا يوم رياضي، أو النهاردة عندنا حفلة، أو المدرسة قالت: إنها حتغيب، علشان حتعمل عملية اللوز لابنها الصغير، وقالت: اللي عاوز منكم يقعد في البيت يذاكر، يقعد، وما يجيش، مفيش مشاكل.

والولد كل ما تيجى تصحيه من النوم، يقعد يعيط، ويبرطم، ويبقى متكاسل، مش نشيط، وتلبسه هدومه بالعذاب، وتغسل له وشه بالعذاب، وتحضر له شنطته المدرسية بالعذاب؛ وممكن يقعد يدعى، ويقول: أنا زهقت من المدرسة، يا رب المدرسة تولع، يا رب المدرسين اللى فيها يموتوا، يا رب المدرسة تتهد على صحابها، ويبقى عاليها واطيها.

مازن طفل، عمره ١٠ سنوات، أيام الثورة، قعد قدام التلفزيون؛ ولما شاف أقسام الشرطة بتتحرق قال: يا رب يولعوا كمان فى المدرسة بتاعتنا! قد ايه حسيت إنه بيكرها وقال: يا رب المدرس الفلانى، وذكره بالاسم، يكون فى ميدان التحرير دلوقتى، وتجيله طلقة فى دماغه، تاخذ أجله، ويموت، ونرتاح منه، وساعات كثير اسمعه بيقول: يا رب نفضل على طول فى أجازة، وبيفرح أوى فى الأجازات، وكان فرحان فى ثورة ٢٥ يناير، علشان الأجازة طالت، وماراحوش المدرسة، رغم إنه شاطر، وذكى جداً، بس أكيد فيه أسباب كثير بتخليه كاره المدرسة، منها المدرسين، وطريقة معاملتهم الفظة، الغليظة للأطفال.

وفيه أطفال بيسهروا قدام جهاز التلفزيون، ويناموا متأخرين، وأهاليهم مايبعلقوش على كده، وببسيبوهم براحتهم، فبالتالى الصبح لما تيجى أمهم تصحيهم. بيكونوا ماخدوش كفايتهم من النوم، والراحة، ويببقوا تعبانين، والنوم فى عنيتهم، وبالضرورة حيفسروا قلة

نومهم، وقلة راحتهم، مرجوعة المدرسة، اللعينة، الى حرمتهم من النوم، والراحة، مع أن الحقيقة أن الى حرمتهم من النوم، هو سهرهم قدام جهاز التلفزيون، وعدم اهتمام الأب، والأم، وعدم حرصهما على ان ينام أطفالهما بدرى؛ علشان ياخدوا كفايتهم من النوم.

لازم كل أب، يجب أبناءه فى المدرسة، وفى العلم، ويساعدهم على التحصيل، والمذاكرة، ويوعدهم بمكافآت لما يهتموا بعلومهم، ويحصلوها، ويحصلوا على درجات عالية، ده لازم يحصل.

الشارع ..
وما أدراك ما الشارع

أنت ممكن تعمل بيت جميل، دافى، وهادى، وآمن، علشان ابنك؛
 لكن مش ممكن تعمل له شارع دافى، وهادى، آمن، وجميل!
 أنت ممكن تزرع الأخلاق فى بيتك، وترعاها؛ لكن مش ممكن تزرع
 الأخلاق، فى الشارع.

البيت محدود، وعدد أفراده محدودين، ويمكن التحكم فيه؛ لكن
 الشارع مفتوح، وعدد أفراده غير معلومين، ولا معلوم أخلاقهم أيه؟
 أو سلوكياتهم أيه؟

الشارع فيه ابنك، بيقابل كل صنف، ونوع، أبو أخلاق، وعديم
 الأخلاق، الشريف، الطاهر، والحرامى؛ أبو لسان طويل، والوقح،
 والمحترم، وكيس الزباله، والمتشرد، والواطى.

يا ترى حتحبسه فى البيت؟ وتمنعه من النزول؟ بحجة خوفك عليه!
 صعب، طبعاً لازم ينزل الشارع، ويحتك بالناس، الصالح، والطالح،
 ويشوف الحلو، وكمان يتعرف على الوحش.

وأبو لسان زالف، وعديم الرباية، والمتربى ابن الناس. هى دى الخبرة
 الحياتية، وأنت عليك تغربله، كل اللى بيحصّله من الشارع، وتنقيه،
 وتوعّيه، وتقول له: ده صح، وده غلط، وده خير، وده شر؛ وإن الإنسان
 سليط اللسان، الناس بتكرهه، وبتنفر منه، وما بتجهوش، والإنسان

حلو اللسان، كل الناس بتحبه، وعرفة إنه لازم يعمل خير، ويتعامل مع الناس بحب، ومودة، وما يفقدش ثقته في الناس، والمجتمع من حوله. وإنه لازم يكون عنده ثقة؛ أن زى ما فيه الوحش، فيه الكويس.

الابن بيسمع في الشارع ألفاظ، ما يعلم بيها إلا ربنا، زى «يا ابن التيت»، ويا ابن ال كذا، ويا ابن الرمة، و«تيت أمك»، و«تيت أبوك»، وحركات، وأفعال صوتية، ما يعلم بيها برضه إلا ربنا. أنت مش حتقدر تسد ودانه، لازم ودانه تلوث، وتسمع الألفاظ دى، وأنت عليك أنك توعّية، وتفهمه أن الألفاظ دى بذئته، وغلط، وربنا مايرضاش عنها، ولا المجتمع، ولا العرف، ولا الأخلاق؛ لأنها منبوذة، وغير مستحبه.

ما هو أنت كمان مش حتقدر تغمّي عينه؛ لازم حيشوف مناظر مش ظريفة، ومش آدمية، وناس «بترازى» في ناس، وناس بتتحرش بناس، وناس بتتخانق مع ناس، ولو مالمقيش ناس تتخانق معاها، بتتخانق مع دبان وشها.

لازم أنت كمان توريله صور حلوة، ومشاهد حلوة، علشان تمحى من عينه الصور السيئة، اللي هو شافها؛ ما تقلقش م الشارع؛ ده معترك الحياة، أنت بتختبره فيه، وبتمتحنه، وبتشوف نتيجة جهدك، وتربيتك، من نتاج حسن تصرفه، في كثير من المواقف، والأمور اللي حتواجه، والمعوقات، والمشاكل اللي حتقابله، وهو حيتصرف فيها ازاي؟ وسيبها على الله، ربنا حيحميه، ويصونه.

التلفزيون ..
اختراع جميل .. القارئ عليه ..
خلوة ببيع للأباء والأمهات



اختراع فاد البشرية، وضرها في نفس الوقت، بس الضرر مش فيه هو؛ الضرر في القائمين عليه. التلفزيون عالم مفتوح، في بيتك، فيه كل حاجة، فيه الخير، والشر، والحلال، والحرام، والصدق، والكذب، فيه الطهر، والعفاف، وفيه الفجر، والرزية، والفسق، فيه الإيمان، والكفر، فيه الالتزام، والانحلال.

طب أزاى أنت تمنع كل ده، إنه يخش بيتك؟ مش حتقدر، ومش حينفع في العصر ده، إنك تمنع دخول جهاز، او اتنين، بيتك؛ ده غير أن مفيش بيت ماقيهوش «دش»، يعني قنوات فضائية؛ من كافة البلدان الشرقية، والغربية، مختلفة العادات، والتقاليد؛ اللي ممكن يكون عيب عندنا، في مجتمعنا الشرقى، ممكن ما يكونش عيب عندهم؛ الحلال عندنا، غير الحلال عندهم؛ يعنى ماتقدرش تتحكم في اللي حتعرضه عليك قناوتهم، وما تقدرش تقعد مراتب ابنك، هو حيتفرج على ايه؟ حيتفرج على قناوتنا المصرية، ولآ على القنوات الفضائية الغربية؟ مشكلة مش كده؟ حاول تتكلم معاه بالعقل، والمنطق، وتفهمه أن فيه برامج، وأفلام، تصلح للمشاهدة، وأخرى لا تصلح؛ وخذ بالك أن الممنوع دايماً مرغوب، أبعد عن أفلام الرعب، والعنف (الأكشن).

علشان ما يطلعش طفل عنيف، حبيه في برامج بعينها، أقعد

أتفرج عليها معاه، وشاور له على لقطات معينة، واشرحها له، وحاول تخليّه ياخذ من الجهاز ده، الشىء اللي يفيد؛ وينفعه، مش اللي يضره، وفهمه أهمية الوقت، على وجه العموم، وإنه يحاول يستثمر وقته، فى شىء هادف، وإن حرام عليه إنه يهدر وقته، فى مشاهدة برنامج، أو فيلم، ليس ذو نفع؛ رغم إنه مش شرط كل شىء الإنسان يشوفه، يكون ذو نفع؛ ممكن الواحد يتفرج على شىء ترفيهي؛ لأن الحياة مش كلها جد، بس أنت حتحاول إنه ما يقعدش قدام التلفزيون ٦ أو ٧ ساعات، يهدر فيها طاقته الاستوعابية، والتحصيلية، ولما يجي يذاكر يكون مرهق، ومجهد، ومنهك وغير قادر على التحصيل، فهمه ايه هدف مخرج، ومؤلف الفيلم، من فيلمه؛ وما تسببهوش يتفرج وبس، زى الحمار، أو الجاموسة، اللي حاسه بالوحدة، والغربة، وخاصة وهو فى السن الصغير ده.

علمه إنه لازم يكون انتهى من واجباته، وذاكر دروسه، قبل ما يروح يتفرج على التلفزيون، مش يسب، ويهمل مذاكرته، ويقعد «مستكنيص»، مضجع، ومرتاح يعنى، يقزقز لب، وهو بيتفرج على «سلاحف النيجا» مثلاً، أو كارتون «بن تن» أو «سبونش بوب» أو «شون ذا شيب»، أو «توم وجيرى» أو «دورا».

عرّفه إن مش كل اللي بيشفوفه، قدام عينيه، بيحصل فى الحقيقة؛ وإن فيه حاجة اسمها مؤثرات صوتية، وخدع سينمائية، وحيل، وتكبير،

وتصغير؛ ماتسيبهوش زى الأطرش فى الزفة. علمه ان فيه حاجات أهم من مشاهدة التلفزيون، زى القراءة، والاطلاع، وغيرها، وغيرها.

ولما تلاقى ابنك واقف فى وسط الصلاة، أو «الريسبشن» بيغنى ويقول: «يا حبيبى المحشى استوى قرب خدلك صوباعين فى الهوا» أو «يا خساره الشبشب ضاع يا خساره ده كان بصوباع».

ولما تسأله سمع الكلام ده فىن؟ ويقول لك: فى التلفزيون يا بابا! عرفه أن مش كل اللى بيسمعه، ويشوفه فى التلفزيون، يحتدى به، وإنه شىء جيد، ونافع. فهّمه ان اللى بيقوله ده، ابتذال، وإسفاف.

ماتسيبهوش يقول الكلام ده، وتضحك أنت، وأنت ماشى رايح أوضتك، أو داخل الحمام، وتخلّى الولد يشوف ضحكك، أو بسمتك دى، ويحرص ان هو يحفظ لك النوعية دى دايماً من الجمل، والألفاظ، والأغانى، ويسمعه لك؛ طالما حس إنها عجبك، حسسه بنفورك من الكلام ده، حتى لو كنت عاوز تضحك؛ أكتم ضحكك، ما هو هم يضحك، وهم يبكى.

هو من الراجل في البيت يا بابا؟
أنت ولا ماما؟
ماما طبعاً يا حبيبي

ساعات كثير، أباء بتسمع الكلمة دى، أو السؤال ده، من أبنائها،
وده طبعًا لما الأب، والأم مايكونوش متفقين على مبدء واحد، وفكر
واحد.

الولد يروح لأمه يقول لها: مثلاً أنا عاوز أنزل العب شوية يا ماما،
الأم تقول له: لأ .. مفيش نزول م البيت، ولم نفسك، أنت كده حتتعلم
الصياغة، روح ذاكر دروسك، أو روح اتفرج على التلفزيون، قصدها
«الدش» طبعًا، والقنوات الفضائية؛ لأن التلفزيون الله يرحمه، وخاصة عند
الأطفال اللي بقوا، أو بقى التلفزيون عندهم، هو «نيكولوديان»، «إسبانس
بوب» و(MBC3)، والجزيرة أطفال، وغيرها من هذه القنوات.

الواد يقعد ساعتها يبرطم، ويقول: «أوف»، ودى حاجة تقرف،
وعيشه خره.

ويدخل الولد لأبوه، المشغول بشيء ما عمل مثلاً، أو قراءة جريدة،
أو مشاهدة فيلم أجنبى، أو بيحاول ينام، ويسأله الولد، ممكن أنزل ألعب
شوية يا بابا؟

والأب طبعًا مش ناقص خوته دماغ، وصداع، وعائز يا أما يشوف
هو بيعمل ايه، أو بيقرأ فى أيه، أو بيتفرج على ايه، أو عائز ينام شويه،
من غير دوشة، أو ازعاج، يقول للولد: انزل، بس ما تروحش بعيد، وما

تأخرش، وأوعى تتخانق مع حد، أو أوعى توسّخ هدومك، أو أوعى تعدّي الشارع العمومي، والعب تحت، وجنب البيت، أو العمارة، وأوعى تقع على السلم.

واوعى حد يضربك، أب طبعًا، وخايف على ابنه؛ الولد يفرح، وممكن كمان يبوس أبوه، ويجي الولد يروح عند الباب - باب الشقة - ويتسحب علشان، ينزل بشويش. من غير أمه ما تشوفه، أو تحس بيه؛ أمه تلمحه بطرف عينها، أو تسمع باب الشقة، وهو بيتفتح؛ مع أن الولد بذكائه، حاول يفتحه بدون ما يعمل صرير؛ إلا أنه رغم عنه طلّع صوت، وأمّه سمعته؛ تنده عليه، وبشخط تقول له: ولد.. أنت رايح فين؟ إنت ما بتسمعش كلامي؟ أنا مش قلت لك مفيش نزول؟ وممكن كمان تقوم، تشده من ودنه، أو تضربه، الولد يعيط، ويقول لها: أنا استأذنت من بابا، وبابا قال لي: انزل، تروح الأم قيلاله: أنت بتكذب عليا، وتخش تسأل أبوه، هل هو فعلاً سمح للولد بالنزول، ولا لأ؟ الأب يقول لها: أه، أنا قلت له أنزل، الأم تقول له: يعني أنت بتكسر كلامي! أنا قلت الولد ماينزلش، يعني ماينزلش، الأب يشتري دماغه؛ علشان هو مش عاوز مشاكل، يقوم قايل لها: خلاص أهم عيالك، وأنت حرة فيهم، وأعملي اللي انت عيزاه، عاوزة تنزليه نزليه، مش عاوزة، بلاش. الواد يسمع كلام أبوه، يندهش، وربما يحس أن أبوه ماهوش كلمة، أو ملهوش لزمه، أو بيخاف من مراته؛ اللي هي أمه، يصرخ، ويروح يقول لابوه: من ورا أمه، أنت مش قلت لي انزل؟ ليه

دلوقتى رجعت فى كلامك؟ ليه سمعت كلام ماما؟ مش أنت الأب؟
مش أنت راجل البيت؟ ولأ هى؟

طبعا الأب حيندهش من أسئلة ابنه، وممكن يجاوية بأى إجابة غبية،
أو يشخط فى الولد، أو يحس أن كرامته اتجرحت، وان الولد المفعوص،
اللى لسه ماخرجش من البيضة ده، داس على جرحه، وحسسه بوجيعته،
ساعتها يا أما يشخط فيه، يا أما يقول له: انزل، ويتخانق مع أمه، خناقة
لرب السما.

وممكن كمان أمه من غيظها؛ تلحق الولد على السام، وتضربه علقه،
وتفش غلها فيه؛ وكل ده ممكن يحصل، ويحصل، ويحصل أكثر من
كده كمان. وممكن الجنان، وقلة العقل فى حالة زى دى، توصل الأب
والأم لمشكله، على أثرها الأم تسبب فيها البيت، أو الأب يتشكك علشان
كرامته، ويرمى عليها يمين الطلاق، والبيت يتخرب، والعيال تتشرد.

وده طبعا ماينفعش، زى ما هو ماينفعش الولد يروح أو البنت -
مفيش فرق - يروح يطلب حاجة معينة من والدته، فلوس مثلا، تروح
أمه قيلاله: روح خد من أبوك، أو روح قول لأبوك، والولد يسمع
الكلام، ويروح يطلب من أبوه، الأب يقول له: روح خد من أمك،
وهكذا دواليك، ويشقوا الواد لبعض، (نظام دوخينى يا لمونة) والولد
يزهق، ويبقى حيران، ومش راسى على بر، يطلب من مين؟ ومين اللى
المفروض يديله؟ وده مش أسلوب تربية، ولا تعامل مع الأبناء.

المفروض يكون فيه ادوار معينة، كل واحد يقوم بيها في البيت، تقسيم أدوار يعنى، اختصاصات، الأب، والأم يتفقوا عليها، قبل ما حتى يخلفوا أول طفل؛ المسألة ما بتتسأبش كده، أو تبقى «جهجهونى»، لأن دى بتأثر فى نفسية الطفل، وبتفقد الثقة فى أمه، وأبوه؛ ربوا عيالكم صح.

رسالة على باب التلاجة



علمه الرحمة، والرفقة؛ أنه يكون رحيم، على أخوه الصغير، وعلى أخته الصغيره، وعلى أمه، وعلى الناس جميعًا، وعلى الحيوانات، والطيور، والزرع اللى، ربنا خلقه وأوجده؛ ماتخليهوش قاسى، غليظ القلب، وده بيتنمى فى الطفل من صغره، علمه يقدر ظروف الناس، وظروف أمه، لما تكون تعبانة، ومرهقة، وظروفك أنت كمان؛ لما تكون عيان، وظروفك المادية كمان، وما يرهقكش بطلباته، ويُصر وبألحاح، أنها تتوجد، وإنك تجيبها، وخصوصًا لما يبدأ يتكلم، ويواجهك، ويقول لك: أنت أبويا، يعنى أنت لازم تصرف عليا، وحقى عليك إنك تجيب لى كل حاجة، وواجبك، إنك ماتحرمينش من حاجة، وما تقصرش فى تلبية طلباتى.

أنا سمعت ابن صديق ليا، بيتكلم مع والده، بنفس الطريقة دى، وبنفس الأسلوب ده، والأب واقف مش عارف يرد على ابنه، وانتابته حالة من الذهول؛ ابنه اللى عنده ١٢ سنة، حتى لو ده ما كانش كلامه هو، أو ديه كانت عقليته هو؛ اللى يفكر بيها، وده كلام والدته ليه، أنا أخذت الولد، وقعدت اتكلمت معاه على جنب، وقلت له: كلامك صح؛ بس فيه حاجة انت غافلها، صحيح حقا على والدك أنه يجيب لك كل اللى أنت محتاجه، من أكل، ولبس، وشرب، وكتب، وفلوس دروس، ومجاميع.

لكن واجبك نحوه، إنك كمان ترحمه، وتكون رؤف بيه، وتعرف أن هو بيشقى، ويتعب، علشانك، وعلشان أخواتك، وعلشان يحافظ لكم على البيت ده، واستقراره، وهو حيجيب لك كل حاجة، فى حدود امكانياته هو؛ وأنت ماتطالبهوش باللى هو فوق طاقته، وخارج عن امكانياته، والحياة مش كن فيكون. أنت طلبت، وأصبر عليه بقى، لحد ما ربنا يقدره، ويجيب لك اللى أنت عاوزه، مش تقعد «مبوز»، ومكشّر فى وشه، وتزن عليه كل شوية، وكل ماتشوفه، وتثير اعصابه، وتحسسه أنه مقصر، وماينفعش كمان إنك تكلمه بالأسلوب ده.

هو ما احتدش عليك، وماهر كش، أو زجرك، أو قال لك: حتى كلمة، أو جملة: عيب تكلمنى بالطريقة دى، لازم تحترم والدك أكثر من كده. كان ممكن يضربك، ويعنفك، ويقول لك: أنا مش حجيب لك حاجة، لأنك ولد مش بتعرف تتكلم مع أبوك بأدب، لكن هو فى حالة ذهولة من كلامك امتنع أنه يرد عليك وعلى فكره مفيش أب فى الدنيا ببخل على ابنه، أو بيرفض إنه يحقق له طلب؛ إلا إذا كان مش فى مقدوره، فى الوقت الحالى، لكن أول ما ظروفه بتسمح، أول شىء يفكر فيه أى أب، هو طلبات أولاده؛ لازم الابن يحس بيبك من صغره، ويحس أنت قد ايه بتتعب علشانه، هو واخواته، ولازم يحس بكل الناس، ولازم يكون رؤف، ورحيم مش بالناس بس؛ لأ بالحيوان كمان.

أكم من أولاد صغار، بنشوفهم فى الشوارع، رابطين كلب من ديله،

أو قطة من ديلها، وسحلينها على الأرض، وده حرام، وفي منتهى القسوة؛ لازم تعلمه أن الحيوانات لها روح، وما ينفعش تعذبها، وده بيتزرع في الطفل من صغره. أنا في يوم من الأيام، لقيت في البيت رسالة على باب الثلاجة، كاتبها إلى أولادي؛ لأنهم كانوا مش عارفين يشوفوني، من ظروف شغلي، كتبوا فيها بالنص:

بابا: أنا ومازن زعلانين منك، ومش حنكلمك تاني، لأنك سايب «كيّتي» - الكلب بتاعهم - عيانة، ومش بتسأل فيها، وهي لازم تروح للدكتور؛ علشان يكشف عليها، ويكتب لها علاج، ولا هي علشان مش بتعرف تتكلم وتقول: الحتة دي بتوجعني، أو أنا عيانة، أحنا نسيبها كده؟
لو أنا يا بابا اللي كنت عيان، أو أخويا، مش كنت حتجري بينا على المستشفى، وتكشف علينا؟ هي «كيّتي» مش لها روح زينا؟ وأحنا كلنا بنحبها؟ حرام عليك يا بابا، أحنا زعلانين منك أوى، ومخاصمينك، ومش حنكلمك تاني؛ لحد ما تاخذ «كيّتي»، وتودّيها المستشفى، وتكشف عليها، وتجيّب لها العلاج.

بابا احنا بنحبك أوى، وبنحب كيّتي

يا ريت أنت كمان تحبها، زي ما بتحبنا

الأمضاء: أولادك حازم ومازن

قد إيه أنا فرحت بالولاد دول، وبرحمتهم، وعطفهم على الحيوان،
الى ما بيعرفش ينطق، ويقول ايه الى هو واجعه.

فرحت بحنيتهم عليها، ولمست فعلاً تقصيري، وأخذت الكلب
تانى يوم على المستشفى البيطرى، وكشفت عليها، واشترت لها العلاج،
وهما قد إيه فرحوا ساعتها، وقدرت أنى ادخل السرور على قلبهم،
يا رب ولادكم يكونوا كده، عندهم رحمة بالحيوان.

علموهم.. علموهم إنهم يحبوا الحيوان، والطير، والزرع.

عرفوهم أن قطف الورد، وتقطيعها لمجرد تقطيعها، مش شىء
مفيد، علموهم ما يدوسوش على الزرع بأحذيتهم، علموهم يراعوه،
ويسقوه، ويحافظوا عليه.

علموهم معنى جمال الورد، والزرع، وفائدته لينا.

علموهم الرحمة، والرأفة بالحيوان، والنبات.

واللى حيرأف بالحيوان، والنبات، ويرحمه، بالتالى حيكون رحيم،
ورؤف بالإنسان.

أنت ما بتجيش غير بالشكاليطة؟



تعالى لحمو.. أيه يا واد! أنت ما بتجيش ليه؟ أنت ما بتجيش غير
بالشكاليطة؟ تحالى يا ولا. تحالا لعمو - «محمد صبحى» فى مسرحية
«الجوكر»، فى دور عم «أيوب الجواهرجى» -.

أطفال كثير، أهاليهم عودوهم، إنهم ما يعملوش حاجة، بدون
مقابل مادي، محسوس، وملموس؛ وده فى حد ذاته أكبر غلط؛ لأن الابن
بيطلع ما بيعملش، ورافض كمان إنه يعمل أى شىء بدون مقابل.

الحكاية بتبتدى سهلة، وبسيطة، وغير مدروسة، أنت بتطلب من
إبنك طلب، مايرضاش مثلاً: زى ما تقول له: روح هات لى كوباية ميه،
الولد يتحجج لك، ويقول لك: خلى فلان يقصد طبعاً أخوه التانى، أو
خلى فلانة، اللي هى أخته، هى اللي تروح تجيب لك كوباية الميه، وأنت
تسأله، طيب أنت لأليه يا حبيبي؟ يتحجج الولد، ويرد، ويقول لك:
أصل أنا رجليا بتوجعنى، أو بطنى بتوجعنى، أو أصلى مش قادر، أو
كسلان، أو يقول لك: هو كل حاجة كذا، كذا؟ هو ما فيش فى البيت
ده غير كذا؟ يقصد طبعاً نفسه، تقوم جنابك تحاول ترشيه، وتقول له:
طيب هات لى كوباية الميه، وأنا حديك جنيه، أو ٢ جنيه، أو حجيب لك
شيكولاته؟ طبعاً الولد هنا حيفرح، وعينه حتلمع، وبيتسم، ما هو عيل
فى الأول، وفى الآخر، حيفرح سواء بالاتنين جنيه، أو بالشيكولاتة.

وحنسى تعب، ورجليه اللي وجعاه، أو اللي بيدعى إنها وجعاه،
وحنسى كمان وجع بطنه، المزعوم؛ وغير الحقيقى، وحيروح جرى،
«فريرة» زى الحمامه، يجيب لجنابك كوباية المية؛ علشان ياخذ المكافأة،
اللى أنت وعدته بيها؛ رغم إنها مش مكافأة، دى رشوة! علشان يسمع
كلامك، والمصيبة إنك تقول له: بعدين ابقى أدّيك، أو معايش فكه
دلوقتى، بعد ما يجيب لك طلبك، أو تقول له: أنت صدقت؟ أنا كنت
بضحك عليك؛ علشان تروح تجيب لى الميه؛ هنا بقى يبقى حضرتك
غلطت، غلطتين، أول غلطة هى: أنك حاولت ترشيّه، وتانى غلطة،
أنك وعدته، وما وفتش بوعدك، وهنا حتهتز صورتك جواه، ومش
حيثق فيك نهائياً، وحيعتبرك كداب، وضحكت عليه، وطبعاً مش
حيصدقك تانى، أبداً، ولا حيثق فى وعودك، وحيكذب زيك لما يكبر،
وحيوعد، وما يوفيش بالوعد؛ يعنى حضرتك لازم تديله اللي وعدته
بيه، طالما وعدته؛ رغم أنك كده حتكون علمته، إنه ما يعملش حاجة،
من غير مقابل. ويمكن بعد كده تلاقيه يسألك أنت مش عاوز ميه؟
مش عاوز حاجة؟ انزل اشتريلك حاجة من تحت؟ ما هو كل مشوار
من دول بحسابه، وحتطلعه إنسان ما دى، ولو أمه طلبت منه طلب، إنه
ينزل يشترى لها حاجة مثلاً من تحت، حيقول لها: أخذ ٢ جنية الأول،
أو أخذ باقى الفلوس، ولو أخوة، أو أخته طلبت منه أى طلب، ولو
حتى كان طلب بسيط، حيطلب المقابل، وحيكبر، ويكبر معاه مفهوم
إن كل شىء، لازم يكون قدامه مقابل، وثمان، مش حىخدم حد أبداً،

لوجه الله تعالى، أو حينخدمه لأنه هو فعلاً يستاهل الخدمة؛ أنت كده بتصنع منه مرتشى، من صغره. الرشوة عنده لما يكبر؛ مش حيعتبرها رشوة؛ حيعتبرها، شىء مقابل شىء، عطاء مقابل خدمة، أو عطاء مقابل جهد مبذول.

حيتعامل مع كل الناس، بنظام المنفعة، أنا حاخذ كام؟ وحكسب كام؟ ودة فى حد ذاته، أكبر الغلط؟

والغلط على الزلط، على نحك طبعاً، اللي زى الزلط.

اتعامل مع ولادك صح

هاتى بوسه وأنا أجزوك
شقاوة عيال!!



هاجر، بنت سودة، «كارثة»، شعرها خشن، بنت ناس نوبين،
ملتزمين، عمرها تقريباً ٤ سنوات.

حازم، ولد أبيض، جميل، شعره ناعم، وعينه خضرة، في نفس سنها،
تقريباً عمره ٤ سنوات.

حازم معاه عجلة، واقف بيها قدام باب شقته، يلعب بيها، وهاجر
واقفة جنبه، قدام باب شقتها برضه، بتقول له: اديني لفة يا حازم، خلييني
أركب على العجلة، شويه.

حازم بيرد عليها، ويقول لها: هاتي بوسة، وأنا أركبك العجلة.


هاجر: بس أحنا مش متجوزين يا حازم.

حازم: طيب خلاص، هاتي بوسة، وأنا اتجوزك.

وبتقبل هاجر، وبتدّي حازم بوسة، وحازم بيسمح لها إنها تركب
العجلة، بتاعته، وبيزقها كمان، وهي فرحانه، وهو «منشكح».

طبعا هنا حازم نفسه حلوة؛ علشان ماشافش إنها مختلفة عنه أبداً، ولا
لمس فيها، غير جمال الطفولة، وإنها من سنه، مفيش عنصريه خالص.

حب يبوسها .. ليه؟ يجوز شاف بابا وماما يبوسوا بعض، أو



فتخاف الابنة من الزواج، وترسب لديها عقدة منذ صغرها، وإن كان الابناء أكبر شيئاً، فإنهم قديعون ماذا يفعل الأب، والأم؛ وهذا قد يقلل من نظرة الاحترام لهما، لعدم إدراكهما بحقيقة، وطبيعة هذه العلاقة، أو تغار الابنة، على ابيها، ويغار الابن، على أمه، وتحدث لهما اضطرابات نفسية.

والأجدر هنا، انتقاء الأوقات المناسبة لذلك.

كما يجب على الأم، عدم الظهور أمام أبنائها، بملابس مثيرة، أو خليعة، أو شفافة، أو قصيرة؛ وخاصة لو كان أبنائها، في مرحلة المراهقة.

وداروا على جمالكم، العيال واقفه لكم.

أنا عايز أنام في الوسط
«غناّه»



ساعات كثير، وأوقات أكثر، الأب يفاجأ أن ابنه الصغير، أو بنته بتدخل عليه هو، ووالدته، حجرة النوم، وكلها أصرار أن هي تنام بينهما، وهي بتقول له: يا بابا أنا عايزة أنام في الوسط.

طبعا الأب هنا بيتضايق، ويبحرن، وبيزعل، والأباء نوعان: نوع يتقبل الأمر بهدوء، ويأخذ طفله، أو طفلة في حضنه، ويخلد إلى النوم، وفيه نوع بقى أب تانى صواميل عقله بتفك، في الساعة دى، واللحظة دى؛ ما هو الراجل برضه معذور، مهيا نفسه لليلة بيضا، يقوم ابنه يجي يعكنن عليه، يقوم شاخط في الواد، وقايل له: قوم فز، بلاش دلع، روح نام في اوضتك، أنت كبرت على الحاجات دى، إيه عاوز ترضع؟ يلا امشي، انجر، ويشخط فيه، ويزعده، وينزله من على السرير، والواد ممكن يعند ويقوق، وأبوه يقوم متعصب، وقايم هابده، وشايله، ونكته على الأرض، والواد يعيط بحرقة أكثر، ويكره أبوه، ويكره أمه لو سابتة كده، فريسة لأبوه؛ ولو أمه أخذته في حضنها، وطلبت من أبوه إنه يسببه ينام معاهم الليلة دى، وأبوه قبل ذلك على مضض، وقعد يبرطم ويقول: على آخر الزمن العيال يتحكموا فينا؟ ويقلوا راحتنا، ومزاجنا، ودى عيشة تقرف، ويبص للواد، ويتوعده بالضرب، ويقول له: طيب يا ابن «الكلب» أما وريتك على تحكيماتك دى، وقلة أدبك (نغّه) يا روح أمك؟ ده أنت قرب يطلع لك شنب، والأب ممكن يهرى، وينكت، ويبقى لا على حامى،

ولا على بارد، ومش بعيد يقوم م السرير، وماينامش خالص، ويولع له
سيجارة، ولا سيجارتين، ويصبر، ويقول في نفسه: أصبر شوية لما الواد
ينعس، وينام، أشيله وهو نايم، أحطه في سريره؛ ما الأب مش عايز يضيع
الليلة البيضاء، ع الفاضي، ويقعد ربع ساعة، نص ساعة، يراقب الواد،
والواد مش عايز ينام، ونايم زى التعلب، فاتح عين، وقافل عين، متوجس
من أبوه، وحاسس أن أبوه عايز يعمل معاه الدنيئه، وبعد نص علبه
سجاير، الأب حرقها، يجي يشيل الواد بهدوء، الواد يفتح عينه، يشوف
أبوه، بيحاول يشيله من على السرير، وياخده من حضن أمه؛ علشان يحطه
في سريره، وأكن الواد شاف بعبع، أو عقرب، ويصرخ، ويعييط، ويمسك
في قميص نوم أمه، ويزغده أبوه، ويقول له: نام يا ابن «الكلب»، ما أنت
بوظت الليلة، ويبص لمراته، ويقول لها: عاجبك كده؟ شكلك مبسوطة؟
وجاتلك ع الطبطاب؟ تقول له: ليه كده يا عباس، هو أنا اللي سلطته
يشبط فيا؟ يرد ويقول لها: الله أعلم؟ ما هو كله من دلحك فيه، تقول له:
خلاص بقى يا عباس، الليالي جاية كثير، استهدى بالله، وتعالى نام علشان
خاطر تعرف تصحى الصبح، تروح شغلك، يرد عباس بغيظ ويقول لها:
ينعل «تيت» شغلى، والله ما أنا رايح الشغل، - ما خلاص برج من دماغ
عباس طار - ساعتها الواد بيحس أن أمه بتحبه أكثر من أبوه، ويقعد يفكر،
ويقول في نفسه: هو بابا ما كانش عايزنى أنام في الوسط ليه؟ ونحه يفتح،
ويفضل الموقف ده ملازمه طول عمره، لحد ما يكبر، ويمكن يحصل إن
الولد فعلاً ينام، وأبوه ينقله لسريره، وأول ما الأب يقرب من مراته، ويجي

يبوسها مثلاً؛ يلاقى الواد فوق دماغه من تانى، بيقول له: انتوا بتعملوا ايه؟ والأب يلطم! ويندب حظه، لازم الأب يتحمل أولاده، ويكون قادر على كبت جماح شهواته، أنا في يوم من الأيام كنت رايح شغلى، وقابلت ولد، عنده تقريباً ١٠ سنين، بيسألنى هي الساعة كام؟ هزرت معاه، وقلت له: أنت عابزها الساعة كام؟ الولد رد وقال لى: عابزها الساعة ٥، سألته ليه كده؟ دى لسه الساعة ٣، يعنى ناقص ساعتين بحاهم على الساعة ٥، قال لى: أصل أنا عندي درس الساعة ٥ قلت له: طيب ايه اللى نزلك بدرى كده؟ لسة ساعتين بحاهم، رد وقال لى: أصل بابا أصر أنى أنزل دلوقتى، وقال لى: روح أقعد فى الشارع، لحد ما يجى ميعاد الدرس! سألت الولد مين فى البيت؟ بحسن نية قال لى: بابا وماما، وسألته ماما كان رأيها ايه؟ قال لى: ماما سككت خالص، وما قالتش أى حاجة لبابا! سألته طيب وأنت حتعمل ايه دلوقتى؟ الولد قال لى: حقدع الرصيف ده زى ما أنت شايف كده، ساعتين لحد ما يجى ميعاد الدرس.

قد أيه اشفقت على الولد ده، ووقفت مش عارف أعمل له ايه؟ وللأسف ما قدرتش أعمل له أى شىء، غير أنى قلت له: خد بالك من نفسك، وسيبته ومشيت، وأنا بسأل نفسى أى أب أبوه ده؟ اللى علشان مزاجه ينزل ابنه الشارع، قبل ميعاد درسه بساعتين، علشان يروِّق نفسه، ومش مهم ابنه يتعرض لأيه، أو مين يتعرض له.

الأب المفروض مايكونش أنانى، بالشكل ده، لو عربية لا قدر الله صدمت الولد ده، أثناء تواجدته فى الشارع، حيكون ايه رد فعل الأب؟

مش حيلوم نفسه، على أنه رمى أبنه فى الشارع؛ علشان مزاجه، وعلشان
ينسجم مع المدام؟ ده أب ده! أنا راضى ذمتكم؟ أطفال كتير أتظلمت
بأبائها، وأحياناً بأمهاتها، الأبوة رعاية، وحماية، وحب، واللى بالشكل ده
لا عنده رعاية، ولا حماية، ولا حب؛ ده اللى أتقال عليه فى المثل الشعبى
(الأب يطفش والأم تعشش).

ليرحم الله أطفالنا، وأبناءنا جميعاً.

الفلكه يا جابر

«حسن مصطفى»

الناظر في مسرحية «مدرسة المشاغبين»



عن عائشة رضي الله عنها: «والله ما ضرب رسول الله بيده امرأة قط، ولا خادمًا له قط، ولا ضرب بيده شيئًا قط». (رواه مسلم).

ماfish واحد فينا ما قرصتهوش أمه، من «لباليبه» وهو صغير -
 طبعًا فيه ناس كثير منكم ما تعرفش معنى كلمة «لباليبه» دى، عمومًا
 «لباليبه» هي داخل الأفخاد - بعنف وغل، وسابت علامة حمراء، في فخاده
 أصبحت زرقاء بعد حين.

ماfish أم ماصفعتش ابنها، بالالم على وشه، أو على بؤه؛ إلا فيما
 ندر، ده أنا أعرف أمهات مجنونة، لما أبناها بيعمل حاجة غلط، بتقوم
 تجرى وراه تعضه - بنت السعراانة - وفيه أمهات بتنزل في ولادها ضرب،
 في أى حطة في جسمها، وتمسكه من حدوده تقطعها، وفيه أمهات بتحطه
 تحتها، وتنزل ضرب في ضهره بالبوانى، وفيه اللى بتسوية بالشبشب، على
 أى حطة في جسمه، وفيه اللى بتضربه بالخرطوم، بتاع الأنبوبة، أو خرطوم
 المياه، أو بحتة جلدة، ومش كده وبس؛ دى ممكن كمان تسمى الجلدة دى
 اسم، زى «عزيزة» مثلاً؛ وكل ما الواد يجى يعمل حاجة ماتعجبش الأم،
 تزغره بعينها، وتبرق له بشر، وتقول له: هاجيب لك «عزيزة»، فيه
 أمهات مفترية، عايزة ضرب الصرم، وفيه أم متخلفة عقليًا، بتحط للواد
 شطة في بؤه؛ شىء في منتهى القسوة، كنوع من العقاب، وفيه أم بتسخن

الشوكة، وتلسه بيها في أيده، وتسيب له علامة، وفيه أم بتولع شمعة، وتنقط منها على أيد أبنها، وفيه بقى اللى بتمده، على رجليه بعصاية، بعد ما تربطه بحبل. الأمهات بتتفنن في أساليب العقاب البدنى لأطفالهن.

أما الأباء، فدول عقابهم مختلف شوية، أو حبتين، يا أما بيضربوا الواد على وشه، صفة، أو صفتين، نخلّى وشه يورم، ويصير أحمر بلون الطماطم؛ يا أما بيخلوا عينه ترف، من شدة الصفة؛ يا أما الأب بيضرب أبنه على قفاه، وفيه أباء بيضربوا «بالبوكس» في الوجه، وفيه بيضربوا بالشلاليت؛ بينزلوا لأطفالهم البواسير؛ ده غير الأب المتهور، اللى بيعجن ابنه، وينزل فيه ضرب بالحزام، أو «بالقايش» - حزام الجيش يعنى - أو بيضربه بأديه، ورجليه، أو الأب اللى بيحلق لأبنه شعره، ويخليه أقرع «زلبطة»، وممكن نفس الشيء بيعمله مع بنته، بيحلق لها شعر رأسها «زيرو»، كنوع من أنواع العقاب البدنى، والنفسى على الأخطاء، وأكم من أطفال ماتوا، أثناء ضرب أهاليهم ليهم، وغيرهم ألت بهم كسور، في الأرجل، والأذرع، ده غير اللى فقدوا عيونهم، جراء الضرب المبرح من أحد الوالدين، سواء الأب، أو الأم. المشكلة أثناء الضرب؛ أن الأب بيضرب ابنه، وهو مشحون، ومنفعل لأسباب أخرى، غير خطأ ابنه؛ منها على سبيل المثال: مشاكل أخرى، يواجهها الأب في عمله، كأضطهاد مرءوسيه مثلاً، أو قلة ذات اليد، أو البطالة، أو تحمله أعباء أكثر من طاقته، أو غيظه من زوجته، أم الطفل لسبب، أو لآخر، تكون مزعلاه مثلاً؛ يروح مطلع غلبه منها، وقرفه منها في عيالها، وده أفضع شىء، أنك

تاخذ ذنب أولادك، بذنب أمهم. حاول دايماً تفصل بين أبناءك، وبين أمهم؛ ماينفعش أطلع غلّي، من كل حاجة مضيقاني، في ابنائي؛ لأنهم ما لهمش ذنب في أعباء، ومشاكل الحياة. المفروض الأب يتمالك غضبه، وما يحاولش يعاقب ابناؤه، وهو غضبان؛ لأن الغضب يذهب العقل أحياناً، أن لم يستطع الإنسان ترويضه؛ وإذا كنت من الأباء الذين لا يجدون غضاضه في الضرب، والإيذاء البدني، وعلى قناعه بنتيجته - رغم إني أخالفك الرأي - فابتعد عن وجه أبناءك، ولا تقرب منه، وإن كان أجدر بك أن لا تضرب أبداً، وعاقب أبناءك بطرق أخرى، غير الإيذاء البدني؛ الذي يخلق طفلاً معقداً، خائفاً، كارهاً لك، وأن لم يفصح عن هذا، وربما تلمح أنت ذلك في نظرات عينه لك، أو في محاولة البعد دوماً عنك، وعدم التقرب منك، أو التودد إليك، خذه بالحسنى، والرفق، واللين، وناقشه، وحاوره، وعلمه خطاه، وعواقب أخطائه، بصّره، ونور عقله؛ هذا أفضل له، ولك فقد يتعود ابنك على الضرب، ويعتاده فكثيرون منا سمعوا أباء، وأمّهات يصفون أبناءهم (بالجِبَلَات)، تلاقى الأم من دول تقول لابنها: أنت أيه يا واد؟ أنت جبلة؟ لا كلام نافع معاك، ولا ضرب محوّء فيك؟ أنت جسمك نحس م الضرب، أنت ما بتحسش؟ وأب يقول عن ابنه: الواد ابني صحته بتيجي ع الضرب، الضرب بيعلم الأطفال، والأبناء البلادة، وعدم الثقة في النفس، الضرب بيعلمهم العنف، الضرب أن دل على شيء؛ فإنه يدل على عدم قدرة الأباء، على الاقناع، والتربية، والفشل في تربية أبناءهم، الضرب أكبر دليل على عجز الأب، والأم.

دع ابنك يحبك، ويحترمك، هذا أفضل من أن يكرهك، ويخافك، يخاف غضبك، يخاف عدم رضائك، أفضل من الخوف من بطشك، واإيذاءك البدني له، أفضل من الخوف من حزامك، أو سوطك، أو حذائك، أو صفة يدك، أو ركلة قدمك.

ولا تبصق على وجه طفلك، «سهما حدث؛ إنك هكذا تحقره، وتحتقره، وتنزل من شأنه، ولا تضربه أمام الآخرين، فتكسر نفسه، وتؤذي مشاعره، وتجعله يبتعد عن الناس، لا تضربه من الأساس؛ هناك وسائل عقاب أخرى مثل: حرمانه من شيء محب لديه، كمشاهدة برنامج تلفزيوني مثلاً؛ بحرص هو على مشاهدته دائماً، أو حرمانه من رؤية مسلسل كارتون، أو عدم جلوسه على جهاز «الكمبيوتر» الخاص به، أو حرمانه من لعبة ما، ولتكن (البلاي ستيشن) مثلاً، التي يحرص هو على الجلوس أمامها، بالساعات، أو حرمانه من المصروف، أو من حلوى يحبها، أو عقابه، بعدم الخروج من المنزل؛ أيام العطلات، هكذا، وهذا أفضل من الضرب.

لا تسخر منه، ولا تهزء به، ولا تفنسى سره، أمام الآخرين؛ حتى لو كانوا بقية أخوته، أو أصدقاءه، أو جيرانه.

ماتريش عليه، ولا تهينه أمام أحد، فيه أباء دائماً كلمة «يا فاشل»، على لسانهم، وده أكبر الغلط، ما تحاولش تجرح مشاعره، ولا تحاول أن تذكره بأشياء يرغب هو في نسيانها.

يعنى ما تقولهوش مثلاً يا «أبو شخه»، أو فاكر لما كنت بتشخ على
روحك، كل شوية، وأنت كبير؟

ما تقلهوش يا (قوقه)، أو يا فقري؛ لو لقيته كثير البكاء، والعياط؛
خده دايمًا بالعقل، والحكمة، وكون صديقة، وصاحبة، من الآخر كده،
اتعامل معاه، معاملة حسنة؛ وبلاش حكاية الضرب دى خالص.
لأنها ليست ذات نفع، أو جدوى.

إنها تؤذى، أكثر مما تنفع.

الضرب أكبر دليل على فشلك كأب، يستطع أن يربى ابناءه.

اسم النبي حارسه وصاينه
«اسءك أبه يا بيضه؟»



اختار له اسم جميل، ماتعهدهوش طول حياته؛ لما تروح تختار له، اسم غريب، مثلاً تروح تسميه أبو شفتورة؛ علشان أبوك اسمه أبو شفتورة، أو تسمية الجحش؛ علشان حماك، اسمه الجحش، وأنت عاوز ترضى مراتك، وترضى حماك طبعاً؛ وماينفعش ترضى حد، مهما كانت درجة معزة الحد ده عندك؛ على حساب ابنك، ماينفعش تسمي بنتك شَفَعَات، أو بخاطرها، أو ست أبوها، أو كيداهم، أو نحمده؛ علشان اسم خالتك، اللي أنت بتحبها اسمها نحمده، أو اسم أمك كده، أو تروح مسمي بنتك عساكر، أو هنومه؛ علشان حماك اسمها عساكر، أو هنومة، وأنت عاوز ترضى المدام، ماينفعش كمان تسميه لو كان ولد، باسم بنت؛ علشان المعتقد اللي يقول: لو بيموت لك عيال كثير وأولاد كثير، سمى ابنك باسم بنت؛ تروح مسميه مثلاً أمل، أو رحاب، أو وفاء، أو إلهام، أو إيمان، وتعقد الواد، ويفضل متعقد طول حياته. اختار له اسم مريح، له معنى؛ بس ما تروحش تسميه «هزبر»، علشان الهزبر اسم أسد، وتضحك الناس عليه، كل ما يسمعوا اسمه، ولا تسميه غراب، أنا أعرف واحد اسمه عبضين، وواحد اسمه حمص، وكده ماينفعش، تخيروا أسماء أولادكم، فاهمين ولا نقول كمان؟ أظنكم كده فاهمين، وماحدث منكم حيسمى ابنه البغل، أو شكشك، أو الجحش، إلا إذا كان البعيد، هو نفسه جحش.

أنا اعرف واحد اسمه بعيص، وواحد اسمه بعيوص، وغيره،
اسمه فوطه؛ وغيره اسمه شفشق، وواحد اسمه حشبة، بلاش تسمى
ابنك باسم زى الأسماء دى، يعنى لو فرضنا أنك سميته اسم وحش،
شراب مثلاً، أكيد حيعانى فى المدرسة، من تريقة زمايله، وفى الشارع
من تريقة جيرانه، وفى الجامعة، نفس الشىء، ده إذا قدر يستحمل كم
التريقة دى عليه، ودخل الجامعة، وقيل الإهانة من زمايله، بالله عليك
يا شيخ لو واحد سأله اسمك إيه؟ هيقول له أيه؟ أسمى شراب، بقى
فيه واحدة فى الدنيا هتقبل ترتبط بإنسان، اسمه شراب؟ وحتواجه
المجتمع إزاي؟ باسم خطيها ده، وبعد كده جوزها، وأبو عيالها،
وعيالها كمان هيواجهوا المجتمع إزاي؟ واسم أبوهم شراب! شراب
إيه يا راجل؟ ده اللي يسمى ابنه كده، يبقى راجل جزمة، ده كده بيعقد
ابنه، عقده بتفضل ملزماه طول حياته، مش حيقدر يتخلى عنها، أو
يشفى منها أبداً.

ربنا سترها مع الواحد، وما زرقهوش بأب مجنون، أو متخلف،
وإلا كان سمي الواحد، اسم متخلف زيه.

أنا من الصعيد، من محافظة سوهاج، قابلت أشخاص هناك اسماءهم
يعاقب عليها القانون، وأسماء خادشة للحياء، أسماء!؟ مش اسماء،
دى أفعال فاضحة، مرة صادفت، وقابلت واحد بلدياتى، اسمه فعل
فاضح، عبارة عن إشارة قبيحة، بالأصبع الوسطى، يهين بها الأشخاص

بعضهم، البعض أحياناً، تكثر في الأحياء الشعبية، لما قابلت الشخص ده، سألته: هو أبوك مالقاش اسم غير ده، يسميك بيه؟ رد عليا، وكله غضب، وقال لى: الله يجحمه مطرح ما راح، لو كنت وعيت عليه، وأنا كبير، ولحقته قبل مايموت، كنت طخيته عيارين، ده فضحني، وجرسني في البلد كلها، الناس في البلد، ماورهاش حاجة، ولا سيرة غير «فلان» راح، «فلان» جه، حاجة تجيب العار.

ولو رحت حتى غيرت اسمي، برضه الناس هتفضل تندهنى باسمي ده، ما هي الناس ماهاش غير اللي اتعودت عليه.

نفسى أفهم، الموظف اللي كان شغال في الصحة، في مكتب تسجيل المواليد، يوم ما الله يجحمه، ما راح يسجلني في المواليد، ويطلع لي شهادة الميلاد، وافق إزاي أنه يسجلني بالاسم ده؟ والموظف ده كمان لو كان عايش لدلوقتي، وكنت أعرفه، كنت طخيته، هو كمان عيارين - لسه الكلام على لسانه - يا جريبي أنا مش عارف اتقدم لواحدة، علشان أكمل نص ديني، وأتجوز، مكسوف من اسمي، وحقوله لأهلها إزاي؟ وعيالي لما يروحوا المدارس، هيقولوا اسم أبوهم إزاي؟ وهيكتبوه إزاي؟ قلت في بالي: الله يكون في عونك، واللي يشوف بلاوى الناس، واللي بيعملوه فيهم أهاليهم، تهون عليه بلوته، وساعتها افتكرت خالتي «منيرة»، الله يرحمها كانت ست بـ ١٠٠ راجل، ست صعيدية، ما قلعتش الأسود على وفاة جوزها، عشرين سنة لحد ما ماتت، وحصلته، لما مات جوزها،

كانت الكلمة كلمتها، والشورة شورتها، كانت ست شديدة، عفيه،
كلمتها تمشى على رجالة، بشنبات.

في بلدنا وغنيه، وميسورة الحال، طين، ونخل، وفلوس تسد عين
الشمس، ربنا رزقها بشوية بنات، تقريباً أربعة، وولدين، كان فيهم
بنت جماها زى ما بيقولوا في مصر، وأهل مصر، «يحل من على جبل
المشنقة»، حاجة كده كوكتيل، عيون «شريهان» ودلعها، وسحر «سعاد
حسنى» وجاذبيتها، وضحكتها، وبسمة «شمس البارودى»، وقوامها،
قوام «سيرين عبد النور»، بأنوثة «نجوى»، دى مفيش راجل في بلدنا
ما اتماش، أنه يتقدم لها، أو يتجوزها، في يوم من الأيام جانى واحد
بلدياتى، وقال لى: أنا جاي اشتكيلك من خالتك يا ولد العم، من أول
وهلة، عرفت إنه بيتكلم عن خالتي «منيرة»، قلت له: خير يا فلان، ما
هو أنا مقدرش اكتب اسمه؛ لأن اسمه عار، ممكن أقوله بطريقة مهذبة،
اسمه «مخاصى» طبعاً هو بص لى شذرا، لما نطقت باسمه، وأنا كنت كاتم
ضحكتى، وطبعاً مفيش حد في بلدنا ما اتريقش عليه، وعلى اسمه، حتى
في سره، خوفاً من بطشه، لأنه كان عنيف، وما بيعرفش يتفاهم، إلا بأيده،
الأخ ده قال لى: بقى أروح أخطب بنت خالتك، نجوى، خالتك تطلب
منى مليون جنيه مهر، وربع مليون شبكة، قلت له: لأ ما عندهاش حق،
الأمانة لله، كانت المفروض تطلب منك، مش مليون وربع، دى كان
المفروض تطلب فوقهم، إنك تكتب لبتتها ٥ فدادين كمان، من أرضك،
الى أنت وارثها عن أبوك، هب فيا، وقال لى: ليه هو أنا هتجوز السفيرة

والغول، وشوال، وأبو الليف، وأبو ستة، وأبو كرتونة، والشايب،
والعجوز، وخشبة، ومفك، ولوح، والغرابة أنك لما تيجى تسأل عن
أسباب التسمية دي، تلاقى الإجابة: أصل فلانة ما كانش بيعيش لها
عيال، راحت سمت ابنها الزبال، أو الجربان، علشان يعيش؛ شوفتوا
التخلف بتاع الناس. وصلنا لأيه؟

ده غير أسماء الشخصيات التاريخية، هتلاقى عندنا في مصر
١٢ واحد اسمهم نابليون، و١٠ يحملون اسم جنكيز خان، وواحد
هولاكو، وكثير قطز، وببيرس، وبيجاد، ولينين، وستالين، والقذافي،
وصدام، وإيزيس، ودول أمرهم هين؛ ده غير سلومة الأقرع، والدرفيل،
والوحش، وحوكة، وسوكة، وحمؤه، وغراب، وعساكر، وكيداهم،
وست اللي شافها ولا صلاح على النبي، وهكذا..

أنا حكيت لكم حكاية غريبة أوى، علشان تعرفوا الآباء، بعلموا
إيه في أبناءهم.

في اليابان حدثت حادثة غريبة، منذ بضع سنوات، عندما رزق السيد
«ياسهورى» بمولود أطلق عليه اسم: «الوردة القذرة» التي خرجت
من قفا النعجة» وحينها رفضت دائرة النفوس، وهى الدائرة المختصة
بتسجيل المواليد في اليابان، تضاهى السجل المدنى عندنا، تسجيل
الاسم، هكذا في مدينة «اكيشيما»، فقام حينها السيد «ياسهورى»
برفع دعوة ضدها، وخسر القضية، ولكنها عاد واستأنف القضية، في

مدينة «كوكيو»، فأبلغته المحكمة، بأنها ستقبل اسم بديل، يختاره هو، فأختار السيد ياسهوري، اسم «اكومانيكاراسي» ومعناها هو «الشیطان التنن» فاستشاط القاضي غضباً، وطرده من المحكمة، فرجع الأب قضية للبرلمان، وهنا تحولت الشكوى إلى قضية وطنية، حول حق المواطن، في تسمية ذريته، كيفما يشاء، وفي النهاية وقف البرلمان بجانب الأب، فعاد إلى الاسم الأول، «الوردة القذرة التي خرجت من قفا النعجة» ورغم أن القانون كفل، واعطى الحق للأشخاص بتغيير أسمائهم، إلا أن هذا نادراً ما يحدث، وأن تجد من يذهب إلى السجل لتغيير اسمه، رغم أن شروط القانون في ذلك، ليست كبيرة، أو عسيرة، فكل ما يطلبه القانون، أن يتفق الاسم الجديد مع الآداب العامة، والنظام العام، ولكنه يحتاج إلى بعض الوقت، والإجراءات، التي تضمن عدم إهدار حق الدولة، والأهل، في تغيير الاسم، حتى لا يتم مثلاً: التهرب من واجب الخدمة العسكرية، أو الاستئثار بميراث، أو في حالات إشهار الإفلاس، مما يستلزم الكشف السياسي، والجنائي، عن صاحب الاسم، قبل تغييره، كما لا يجوز طلب تغيير الاسم إلا لصاحبه، فلا يجدي في ذلك عمل توكيل، لأي شخص آخر، لتغيير الاسم، كأن تغير اسم الزوجة، أو الوالد، أو الشقيق.

يقولوا ساعات إن لكل إنسان من اسمه نصيب، مش دايبا، أنا شايف كده، فما نصيب من اسماء والده العفش. من اسمه؟ غير التأليس، والسخرية، أو من أسماء والديه الدشلوطي، أو الفرشوطي، لكونهما من دشلوط، أو فرشو - مراكز في محافظات جنوب مصر - أو البسيوني،

أو الدسوقي، لأنهما من بسيون، أو دسوق، محافظة كفر الشيخ، أو الزفتاوى، لأنه من زفتى، بمحافظة الغربية.

فمن أسماء والده زكى، قد يكون غيبا، ومن أسماء والده جميل، قد يكون دميما، ومن أسماء والدها أم الخير، قد تكون لا تجلب إلا الشر، فأغلب من يحملن اسم هانم، يعملن خادمت في البيوت، فأين حظهن، ونصيبهن من أسمائهن؟ وهكذا كريم، قد يكون بخيلا، وسعيد قد يكون حزينا، وهكذا دواليك.

فالاسم قد يكون مصدر سعادة لصاحبه، أو يكون مصدر تعاسة، وشقاوء، إذا كان غريبا، وشاذاً، وغير مألوف، أو غير مستحب، أو جالب للسخرية، أو الاندهاش، والضحك، فتخيروا أسماء أبناءكم، حتى لا تجنوا عليهم، ومفيناش من فوطة، ولا خشبة، ولا الدهل، ولا العبيط، ولا أى أسماء تانية غريبة، علشان ولادكم ما يدعوش عليكم. ويقولوا الله يسامحكم.

قال الدهل؟

قال .. دهل يا راجل يا دهل.

أنا جيت منين يا بابا؟
«وخبوب منع البيضن»



الواد ابني المفعوص، اللي لسه ما طلّعش من البيضة، أبو خمس
سنين، ولسه كمان ماكملهمش.

خلانى قاعد على ترايزة السفارة، بتغده أنا وأخوه، وأمه، وسألنى
وقال لي: هو أنا جيت منين يا بابا؟

ارتبكت، والقمة وقفت في زوري، وكنت حزور، وبصيت له
باستغراب، واندهاش، ونقلت نظري بينه، وبين أخوه الكبير، وبين
أمه، علشان أشوف وقع السؤال عليهم، لقيت أمه «مبلمة»، و«مسهمة»
وبتبتسم في خبث، ومكر، ابتسمت، ابتسامة ملهاش معنى، غير حيرتى
في الإجابة، وقلت في بالي: بقى الواد الصغير، يجرؤ ويسالنى سؤال زى
ده؟ هوده وقته، وآوانه، طب أرد عليه أقول له إيه ده؟ ولسه مستنى إنى
أجاوبه، قلت أمرى لله، أقول له أى حاجة؛ علشان اسكته، واسد بقه،
وأكمل أكل، راحت طقت في دماغى، أنى أقول له: جبت م البيضة يا
حبيبي، م البيضة، ماما باضت بيضة، والبيضة فقت، وأنت طلعت
منها، والحمد لله الواد ابتسم، وضحك، وشكله كده اقتنع بكلامى،
وسكت، والحمد لله برضه، أن أخوه الكبير ما علقش، لا على سؤاله،
ولا على إجابتى أنا على سؤال أخوه، بس الواد رجع وسألنى، زى
الفرخة يا بابا؟

قلت له: أيوه يا حبيبي، زى الفرخة بالظبط، ماما باضتك زى ما
الفرخة بتبيض، البيضة، الواد ضحك تاني، والله أعلم إذا كان ده ضحك
بريء؟ ولا ضحك بلووم؟

على فهمه لكذبى عليه، لكن الواد الكبير، كان قاعد يبص لنا،
ويضحك، أكيد فاهم، أنى بضحك على أخوه الصغير، وأكيد هو كمان
فاهم العيال الصغيرة، بتيجى إزاي، ومنين، ما هو ده جيل عفاريت،
جيل التلفزيون، والدش، والانترنت، وجيل كبر، وفهم قبل أوانه،
«الميديا» كبرته، وفهمته، حاجات كتير.

وقعدت كملت أكلى، بس وأنا باكل سرحت، وسألت نفسى
سؤال: هو أنا ليه هربت من إجابة سؤال ابني؟ وكذبت عليه ليه؟ يا
ترى أنا قلت له كده علشان ما كنتش عارف أجابوه، وأقول له إيه؟ أو
افهمه الحكاية إزاي؟ وأنزل لمستوى تفكيره، بإجابة، عملت معاه نفس
الى اهلينا عملوه فينا زمان، وإحنا صغيرين، وغلطت نفس الغلط،
الى هما غلطوه معانا بالظبط، نفس الغلط، دلوقتي، إحنا بنعمله مع
عيالنا، وإحنا كبار.

ما عداش كام يوم، بعد سؤال الواد، إلا ولقيته، كل ما عينه تيجى
فى عيني، يسألني، ويقول لى: هي ماما هتبيض أمتى؟ هي ماما هتبيض
أمتى؟ هي ماما هتبيض أمتى؟

وبقت لبانة فى بوء الواد الصغير، وكمان مش يستر، ويخليها بينى

وبينه، لا ده بقى كل ما يشوفنى، يسألنى قدام الضيوف، والقرايب، والجيران، هى ماما هتبيض أمتى؟ الضيوف طبعاً زى ما أنتوا عارفين، وفاهمين، فضوليون لأقصى درجة، كانوا همه كمان لما بيسمعوه بيسألنى السؤال ده، يسألونى زيه، ويقولوا لى: إيه حكاية البيض دي؟ هى المدام حامل؟ وطبعاً أنا كنت بجاوب، وأقول لهم: ما تاخدوش فى بالكم، ده كلام عيال صغيرين. والواد كان دايمًا يصر إنه يسألنى أنا، أكثر من أمه، هى ماما هتبيض أمتى؟ زى ما يكون قلبه كان حاسس، أن أنا المسؤول الأول، عن البيض، مش أمه.

مع أن الحقيقة، أن أنا ماكنش ليا ذنب خالص، فى الموضوع ده، موضوع البيض، أنا كنت بعمل اللى عليا، واللى بيقدرنى عليه ربنا، وهى اللى كانت رافضة تبيض، وكانت بتقول لى: كفاية البيضتين، اللى عندنا، والحكاية مش ناقصة بيض، البيض مزعج، ومتعب، ومحتاج رعاية، واهتمام، ومصاريف كثيرة، والدنيا بتغلى، مش بترخص، وربنا يبارك لنا فى البيضتين، اللى عندنا، ويطرح لنا البركة فيهم، وعلشان كده؛ كانت بتأخذ حبوب منع البيض، وبقى الولد كل ما يرجع من الحضانة، وأول ما يشوفنى، يسألنى، هى ما ما باضت، ولألسه؟

وأنا أرد عليه، وأقول له: لألسه، ماما ما باضتش، ومش يسكت الواد على كده، لا.. كان يرد ويقول لى: دى حاجة تقرف، اشمعنى الفرخة بتبيض كل يوم؟ وماما مغلبانا ببيضها؟ وأنا كنت بجاوبه،

وأقول له: علشان الفرخة، ربنا سامح لها، إنها تبيض كل يوم؛ لكن الستات، بتبيض كل تسع شهور، ولما ربنا يأذن لماما بالبيض، حتبيض. وراح الواد ماكدبش خبر، وسألنى هى ماما حتبيض كام بيضة؟ وأنا رديت عليه، وقلت له: الطبيعى، إنها تبيض بيضة واحدة بس؟ لكن ساعات، وفي حالات بسيطة، ونادرة، جدًّا، وقليلة الستات بتبيض، بيضتين مع بعض.

وفجأة انتبهت لألحاحه عليا، وسؤاله المتكرر ده، وقلت له: أنت عايز ماما تبيض ليه؟

الواد رد، وقال لي: علشان أنا عاوز «ننه»، بنت، ألعب معاها، رديت عليه، وقلت له: ومين سمعك، كأن الواد كان يقرأ أفكارى، وحاسس باللى بيدور جوايا، أنا كمان كنت عاوز المدام تبيض، والبيضة تطلع بنت، والمدام كانت رافضة البيض، لكن قلت للواد: ربنا يسهل، وماما تبيض، وسألته: أنت ليه عاوز تلعب مع الننة؟ ما عندك أخوك، ألعب معاه، الواد رد، وقال لي: أخويا كبير، أنا عاوز ننه صغيرة، على قدى، ألعب معاها.

وفكرت، وقلت: ده لو فعلاً حصل، وجات الننة الصغيرة دى، ده لو المدام رضيت تبيض طبعًا، وكبرت الننه دى شوية، وطلبت هى كمان ننة صغيرة، علشان تلعب معاها، يبقى كده حكاية البيض دى، مش خالصة أبدأ.

وفضل الواد مستنى البيضة، ومستنى أمه تبيض، كل يوم، وفي يوم كده كنت قاعد سر حان، الواد جاء سألني، وقال لي: هي الفرخة بتبيض على إيه يا بابا؟ جاوبته بسرعة، وقلت له: بتبيض على القش يا حبيبي، والواد سمع منى إجابة السؤال، وخذ بعضه، ومشى من قدامى، على طول؟ بدون أى تعليق، والغريب فى الأمر، إن دى مش عوايده معايا، هو متعود يسأل كثير، ويعلق على إجاباتى دايماً، المرة دى، ما عملش كده خالص، غريبة مش كده؟

المهم بعد كام يوم كده، مش فاكر عددهم، وأنا راجع من شغلي، لقيت المدام بتقول لي: تعالى اتفرج، قلت لها! اتفرج على إيه؟ قالت لي: تعالى بس معايا، واسمع كلامى، وخذتنى من إيدي، ودخلت بيا أوضة النوم، وأنا معاها، وفي طريقى لأوضة النوم، قلت فى بالى: أكيد فيه حاجة حصلت، فى الأوضة، مصيبة مثلاً، أو عيل من العيال، كسر مرآة التسريحة، أو وقع ضلفة من ضلف الدولاب، كسرها، وده اللي كنت بفكر فيه، فى الثوانى اللي مرت علينا، من مدخل باب الشقة، لحد أوضة النوم. وما جاش فى بالى خالص، الشىء اللي أنا شوفته، قدامى أول ما دخلت الأوضة بتاعتى، أنا والمدام، لقيت السرير كله.. أنتوا معايه؟ عرفتم إيه اللي حصل، فى أوضة النوم؟ خمنتوا ولا ماخمنتوش؟ فكركم راح لفين؟ لا مش ممكن تتصوروا، إحنا لقينا إيه فى أوضة النوم؟ حاجة لا تخطر ع البال، ولا ع الخاطر.

أنا كنت فاكر زيكم كده بالضبط، أن كبير الجريمة اللي حصلت،
 فى أوضة النوم، هتكون دواية حبر، عيل دلقتها على ملاية السرير، أو
 كلب مثلاً، من كلاب الأولاد، عمل «بيبي» على السرير، أو على
 سجادة أوضة النوم، بس اللي لقيته غير كده خالص، لقيت السرير كله،
 بأستثناء المخدات منه، مليون قش، قش حقيقى، وشوفت المنظر ده من
 هنا، وجانى ذهول، ونوبة ضحك هيستريه، وخصوصاً لما المدام قالت
 لى: علشان يعجب حضرتك، رديت عليها، وقلت لها لآ، ده علشان
 حضرتك تبيضى، وأنت مرتاحة ع الآخر، وتتمرغى فى القش، وبيضك
 ما يتكسرش، وطبعاً المدام سابت القش، لحد ما أنا أرجع من شغلى،
 وأشوفه، واشوف جراء إجابتى، على أسئلة الواد الصغير.

ده غير بقى أن الولد الصغير قعد يعيط، ويبكى كثير، ورفض أن
 أمه تشيل القش، من على السرير؛ لأن شيل القش، ورميه معناه أن أمه
 رافضة أنها تبيض، وهو عايزها تبيض، بس اللي كان مجننى، ومخيرنى،
 الواد المفعوص ده، جاب القش ده كله منين؟ وخاصة أن عمره خمس
 سنوات، يعنى ما يعرفش ينزل الشارع، واحنا ساكنين فى منطقة، صعب
 أنك تلاقى قش فيها، قش شىء صعب، والولد ما يعرفش أصلاً، يشتري
 أى حاجة، واكتشفت لما سألته هو جاب القش منين؟ أنه ضحك على
 البواب، وأعطاه اتنين جنيه، وطلب منه إنه يشتريه شوية قش، وقال له:
 أن القش ده لماما، وهى اللي طالباه.

وطبعاً البواب ما كدبش خبر، هو كمان، وراح جاب القش ببلاش طبعاً، أكيد شحته من أى محل بيع بيض، وضرب الاتنين جنيه فى جيبه، وأهه كله مصالح، وأنا طبعاً طينت عيشته، وعيشة أهله، ووبخته، ولمته، وقلت له: يعنى لو عيل من العيال قال لك اشترى سم فيران، حتروح تشتري له؟ وعرف البواب غلطته، رغم إحساسى بعدم قناعته، أن هو اللى غلطان، وأحساسه أن أنا بتجنى عليه، وأن ابني هو اللى كذاب.

وطبعاً البواب كان عنده حق، ابني أنا كذاب، وده مش ذنبه، ده ذنبي أنا، وذنوب أمه، أن أحنا مافهمنا هوش أن الكذب حرام، وعادة سيئة، غير حميدة، ومكروهة، وسلوك غير مستحب، وحلف البواب أنه ما يسمع كلام عيال تاني، وحسيت أن لسانه بيقول، المثل المصرى اللى بيقول: «اللى يمشى وراء العيال ما يخلص من ال.....» أنتم عارفين الباقي طبعاً، وأكيد مجربين المثل ده، قبل كده، وأنا كمان ما سكتش، رديت على البواب، وقلت له: حلال عليك ال.....

ورحت للولد، واقنعتة بأعجوبة، أن أحنا لازم نشيل القش ده، من على السرير، وأن الفراخ بس هي اللى بتبيض على قش، وأن أمه لما تيجي تبيض، إن شاء الله، ده إذا باضت من أصله، مش هتبيض على قش، وهتبيض على السرير، من غير قش، والحمد لله، أخيراً الولد اقتنع بكلامى، وقبل اني أشيل القش، أرميه فى الزبالة، وأنا كمان حمدت ربنا، على أن الحكاية وصلت لحد كده بس، وما حصلش شىء أكبر من كده.

وكانت المدام كل ما تقول لى: أنها تعبانة شوية، أو عندها حبة
مغص، أو معدتها مش مظبوطة، كنت بتريق عليها، وأقول لها: يبقى
أنت كده قربتى تبيضى، وعدت أيام كثير، وشهور كثير، وابنى فضل
مستنى البيضة، اللى أمه هتبيضها.

وعدت سنين، والولد بطل يستنى حكاية البيض دى، وأنا كمان
بطلت استناها، لسبب بسيط أوى، مش أن أمه قطع عنها جبل البيض،
لا.. لأنى أنا انفصلت عن أمه، علشان ما رضيتش تبيض، ورحت أدور
على واحدة تانية، عايزة تبيض، وربنا يستر، وتطلع الواحدة التانية دى
بتبيض، وما عندهاش عقم بيض، ودى كانت حكاية ابنى، والمدام،
والبيض..

يا رب التلفزيون بفرقع في وشكم!!

ممکن، وکل شیء جائز

مفیش حاجه بعیده عن ربنا



ماتستغربوش أوى كده، فيه عيال فقيرة كثير، آه والله، بس دمها خفيف، يعنى الواد من دول، يقول لأخواته مثلاً: أنا عاوز أتفرج ع التلفزيون، يقولوا له: ماتتفرج، هو حد حاشك؟ ماهه التلفزيون قدامك، أقعد «فنجل» - من فنجان - عينك فيه، الواد يصرخ ويقول: لأ.. أنا مش عاوز أتفرج على الكورة، مثلاً ده لو كان أخواته بيتفرجوا على «ماتش» كوره، أو يقول مش عاوز أتفرج على الفيلم ده؛ إذا كان أخواته بيتفرجوا على فيلم رعب، وهو بيخاف من الدم، والقتل، والدبح، ويقول لهم: أنا عاوز أتفرج على فيلم كارتون؛ وطبعاً همّ مش حيوافقوه على كده، وحيصروا أنهم يكملوا فرجة، على اللي هم بيتفرجوا عليه، أيّا كان نوعه، فيلم أو «ماتش»، وحيقعد الولد يصرخ، ويعيط، ويتنطط، ولما مش حيلاقى فيه فائدة منهم؛ حتى بعد ما يلجأ لأمه، أو لأبوه، وما يقدر وش يعملوا له حاجة، حيقف قدام أخواته، ويرفع ايده لفوق، ويقول لهم: يا رب التلفزيون يفرقع فى وشكم، أو يا رب النور يتقطع دلوقتى، ولو ساعتها بقى صادفت، والنور اتقطع؛ والواد فرح فيهم، وقال لهم: أحسن، يا أما حيقوموا يضربوه، يا أما حيقولوا له: «نبرت» - من النبر - فيها يا فقري، «وقولت» - من الفال - ع النور يتقطع، أه اتقطع، اتبسط بقى، واقعد «واتبط»، مفيش حد فينا حيتفرج على حاجه، وطبعاً، هو معذور، ماهو مالقاش بأيده حاجة يعملها، غير إنه

يدعى عليهم، وفي حالة أخرى لنفس الولد ده، حتلاقيه بيطلب من أخوه مثلاً، يديله لعبته، يلعب بيها شوية، وأخوه بيرفض؛ رغم بكاء الطفل الصغير، وحيطلب من أمه أنها تقنع أخوه، إنه يسبب له اللعبة دي، دقائق، يلعب بيها، والأم حتطلب من الأبن ذلك، والأبن الأكبر حَيُصر على رأيه، وحيرفض يدّي اللعبة لأخوه الصغير، ساعتها حتلاقي الولد الصغير ده، حيزيد بكائه؛ وحيدعى على أخوه، ويقول لأخوه: يا رب اللعبة تقع منك على الأرض، تتكسر ٦٠ حته، أو يا رب تبوظ لعبتك، وده أقصى ما استطاع فعله، أو ما يستطيع فعله، الولد الصغير.

وفي حالة أخرى لنفس الولد ده، حيطلب من جارتته، مثلاً إنها تنزله معاها؛ وهي نازله ع السلم، علشان هو بيخاف ينزل لوحده، جارتته حترفض تنزله، أو تاخده معاها، «حيكلضم» (من كلمة كلضمه) يعنى غضب، حيضرب بوز، وحيقول لها: يا رب وأنت نازله، تقعى على السلم، هدومك تتوسخ، ورقبتك تتكسر، أو رجلك تتكسر، مية حته، أو يقول لها: يا رب تموتى، أو يا رب تتقلب بيك العربية، لو هو عرف مثلاً إنها خارجة، وحتركب عربية، وهو كان عاوز يروح يتفسح معاها، ويركب العربية وهي رفضت.

وفي حالة أخرى، لنفس الولد ده، أيضاً مثلاً هو عاوز يدخل يستحمّى، وأخوه دخل قبله الحمام، من قبيل العند عند العيال، أو الأخوات في بعض، الولد حيقعد يعيط، ويدعى ويقول: يا رب الميه تنقطع عليك، وأنت بتستحمّى، ويكون الصابون في عنيك، يحرقك، وماتشوفش تانى.

الولد ده بيكون حاسس بالأضطهاد، أو تلاقية بيدعى ويقول: يا رب المدرسة تتهد، أو تولع، وتتحرق، أو اللمبة تفرقع، أو النور يضرب، أو الحاجة الفلانية تندلق.

وده قمة الإحساس بالضعف، وعدم وجود أحد، يستطيع أن يقف معه؟ حتى والديه، وبيحس كمان بالقهر، وبيكره صغره، وبيتمنى إنه لو كان كبير، أو أكبر من كل أخواته؛ علشان يقدر يعمل اللي هو عايزه، زى ما أخواته بيعملوا اللي همهم كمان عايزينه، وبيتحكموا فيه، هو كمان نفسه يتحكم فيهم، وساعات بتلاقية، بيدعى على نفسه، ويقول: يا رب أموت، وترتاحوا منى، ده طفل محتاج حنان، وتفهم، ورعاية .

أفك مين يا ولا؟
أنت ابن مين؟ ابن نفيسه؟
ولا ابن زينان؟ ولا ابن جالان؟

اختار أمه:

لا بد أن يختار، ويتخير الأب أم طفلة، أو أبنائه قبل أى شىء؛ أن هذا الاختيار هو اللبنة الأولى، والأساس الراسخ، والسبيل القويم لتربية أبناء صالحين، إذن أولى الأشياء التى يجب على أب المستقبل أن يفعلها، هى اختيار الأم الصالحة، التى تعينه على تربية أبنائه، هذه هى الزوجة، مربط الفرس.

قال رسول الله ﷺ: «تزوجوا الودود الولود».

(رواه أحمد وصححه ابن حبان)

وقال أيضاً ﷺ: «خير نسائكم الولود الودود».

وقال ﷺ: «سوداء ولود خير من حسناء لا تلد».

فالأب عليه أن يسعى، ويكد، ويجتهد، ويعمل، ويشقى لتوفير المال اللازم، من أجل إسعاد الأسرة، الزوجة والأبناء، وتحقيق متطلباتهم اليومية؛ من ملبس، ومسكن، وطعام، وخلافه، والأم عليها القيام بدورها فى البيت، من رعاية أولادها، وتوفير الراحة لهم، ولزوجها حتى يتحقق للأسرة جميعاً الأمن، والأمان.

فقد قال تعالى: ﴿وَمِنْ آيَاتِهِ أَنْ نَقُلَ لَكُمْ مِنْ أَنْفُسِكُمْ أَزْوَاجًا لِتَسْكُنُوا إِلَيْهَا وَجَعَلْ بَيْنَكُمْ مَوَدَّةً وَرَحْمَةً﴾ [الروم: ٢١].

فالمودة، والرحمة هما اللذان يجعلان البيت ملائماً، لحياة ينمو فيها الأبناء، نمو سليم، وتستقيم فيها تربيتهم، وينشأون فيها، نشأة خالية من التوتر النفسى، والأضطراب، والخوف، والقلق.

فإن على اختيار الرجل زوجته؛ يتحدد شكل الحياة مستقبلاً، ويتحدد مستقبل أبنائه، ونوع تربيتهم، هل ستكون تربية سليمة؟ أم تربية منقوصة؟ وهذا ما أقرببه عمر بن الخطاب رضي الله عنه عندما سأله أحد أبنائه عن حق الابن على أبيه، أجاب سيدنا عمر رضي الله عنه: أن ينتقى أمة، ويحسن أسمه، ويعلمه القرآن.

لذا الزوجة الصالحة، هى أول الخيط، ومن يوفقه الله فى زوجة صالحة، فليحمد ربه، ويشكره، ويبوس أيديه، وش وضره.

ومن لم يحسن اختيار زوجته؛ فليرحمه الله برحمته، وليصبر، وله جزاءً عظيماً، ومن لم يطق صبراً، فالطلاق هو الخير، فهو ابغض الحلال عند الله؛ ولكن الله تعالى يقول: ﴿لَا يُكَلِّفُ اللَّهُ نَفْسًا إِلَّا وُسْعَهَا﴾ صدق الله العظيم [البقرة: ٢٨٦].

والأرواح جنود مجندة، من تعارف منها ائتلف، وما تناكر منها اختلف، ولا بد للرجل أن يختار زوجته على أساس الدين، ويقول رسول الله ﷺ: «تنكح المرأة لأربع لما لها ولحسبها ولجمالها ولدينها فاظفر بذات الدين تربت يداك».

الجمال ليس كل شيء في الزوجة؛ فأهم من الجمال الشكلي، الجمال الجوهري، لأنه هو الذي يدوم إلى الأبد، ولا يتغير، فالطيبة، الودودة، الحنونة، العاقلة، الرشيدة؛ تظل أبداً كما هي طيبة، وحنونة، وعاقلة، وصالحة، وفي هذا يقول رسول الله ﷺ قال: «إلا أخبركم بخير ما يكتنز الرجل؟ المرأة الصالحة إذا نظر إليها سرته، وإذا غاب عنها حفظته، وإذا أمرها أطاعته».

وما يبرهن على صدق الحديث، أن عمر بن الخطاب في عهده؛ ذهب زوج امرأة إلى الجهاد، وغاب عنها كثيراً، فتحرقت شوقاً إليه، إلى رجل، وثارَت في جسدها ثورة الأنوثة، وتأججت فيها غريزتها؛ إلا أن إيمانها بالله، واليوم الآخر، هو الذي جنبها الوقوع في الدنس، سمعها عمر في جنح الليل تقول:

لقد طال هذا الليل وأسود جانبه
وأرقنى ألا حبيب إلا عبه.
فوالله لولا الله تُخشى عواقبه
لحرك من هذا السرير جوانبه

فراح عمر إلى ابنته حفصة، أم المؤمنين فقال لها: كم تصبر الزوجة على زوجها إذا غاب؟.. قالت: أربعة أشهر، فأرسل إلى قواده، في جبهات القتال، يأمرهم إلا يجسوا جنديا، عن أهله أكثر من أربعة أشهر.

وعن أنس رضي الله عنه أن النبي ﷺ قال: «من تزوج امرأة لعزها لم يزد»

الله إلا ذلاً، ومن تزوجها لما لها لم يزد الله إلا فقراً، ومن تزوجها لحسبها لم يزد الله إلا دناءة، ومن تزوج أمراه لم يرد بها إلا أن يفض بصره، ويحصن فرجه، أو يصل رحمه، برك الله له فيها، وبارك لها فيه». رواه الترمذى.

عن الرسول ﷺ إنه قال: «إذا جاءكم من ترضون دينه، وخلقه فزوجوه، وإلا تفعلوا تكن فتنة في الأرض، وفساد عريض».

ويجب أن تختار الزوجة ذات الخلق الكريم، والتي ليس بها أية أمراض وراثية، أو عاهات جسدية، أو شاذة أخلاقياً، أو ضعيفة العقل، أو معتوهه الفكر.

قال رسول الله ﷺ: «تزوجوا في الحجر»^(١) الصالح فإن العرق دساس»، وقال أيضاً ﷺ: «إياكم وخضراء الدمن»^(٢)، قالوا: وما خضراء الدمن يا رسول الله؟ قال: «المرأة الحسناء في المنبت السوء».

فعلم الوراثة اثبت أن الطفل، يكتسب صفات أبويه الخلقية، والجسدية فالذى يختار زوجته على أساس الأصل، والشرف، والصلاح فسينشأ أولاده على الخير، والعفة، والطهر، والاستقامة وعن رسول الله ﷺ قال: «لا تنكحوا القرابة فإن الولد يخلق ضاويًا»^(٣)، ويجب تفضيل ذوات الأبقار، وحكمة ذلك حديث رسول الله ﷺ: «عليكم بالأبقار فإنهن

(١) الحجر: الأسر.

(٢) خضراء الدمن: عشب المزابل.

(٣) ضاويًا: نحيف، ضعيف الجسد، بليد الذكاء.

أعذب أفواها^(١) وأنتق أرحاما^(٢) وأقل خبثا^(٣) وأرضى باليسير^(٤)» (رواه الطبرى).

والسبب في ذلك إنها تكون أكثر إنجابا، وأشد تعلقا بالزوج، وترضى باليسير من النفقة، والنكاح، لأنها لم تجرب الرجال، فتقارن بين زوجها هذا وبين زوجها ذاك، والبكر محبوبه على الأنس، والألفة بأول إنسان، تكون في عصمته؛ بعكس المرأة الثيب، المطلقة، أو الأرملة.

فقد قالت عائشة رضي الله عنها لرسول الله صلى الله عليه وسلم، كما روى البخارى: يا رسول الله أرأيت لو نزلت واديا فيه شجرة قد أكل منها ووجدت شجرة لم يؤكل منها في أيها كنت ترتع بعيرك؟ قال عليه الصلاة وأفضل السلام: في التي لم يرتع منها، بمعنى أن رسول الله صلى الله عليه وسلم لم يتزوج بكرا غيرها، وتقصد هنا عائشة بيان فضلها على باقى الزوجات، بأعتبار أن الرسول لم يتزوج بكرا غيرها.

فتربية الأولاد في الإسلام، يجب أن تبدأ بالزواج القويم.

نتكلم شوية بالبلدى، بالعامية يعنى بعيد عن الدين، والفصحى، وقال الله، وقال الرسول، علشان الناس «الهلله» اللى يفهموا بالسليقه،

(١) أعذب أفواها: طيب الكلام.

(٢) أنتق أرحاما: كثرة الأولاد.

(٣) أقل خبثا: أقل مكر وخديعة.

(٤) أرضى باليسير: المال والجماع ونحوهما.

الناس اللى على سجيتهم، بأختصار شديد، وكل جوازه وانت طيب، يا راجل يا طيب.

ما ينفعش الواحد يتجوز رقاصه، أو عالمه أو «هشك بشك»، أو فتاحه فى كبارية، أو «زانية»، أو واحدة صايعة، وسيرتها على كل لسان، وما ينفعش تتجوز واحدة متخلفة عقليًا، أو معتوهه.

ما ينفعش تتجوز واحدة أهلها ولاد ستين فى تسعين؛ لهم باع، وصيت فى الإجرام، دعارة يعنى، أو تجارة مخدرات، أو سرقة، أو نصابين، أو بلطجية، أو قتلة، وهكذا.

فهمت يا أخ، ولألسه ما فهمتش؟ أنا حاسس انك فهمت.

على بركة الله

إذا كان رب البيت بالدف ضارب؛
فشيعة أهل البيت الرقص والطرب



الأب لابد أن يكون محترم، ووقور، وذو هيبة؛ حتى يحترمه الأبناء، ماينفعش يكون غير كدة، ماينفعش يكون مُهزَّء، أو عديم الشخصية، ماينفعش مراته تشخط فيه، قدام عياله، وتهزَّء، وتشتمه؛ ولو حصل كده، وتناولت عليه؛ بالتالي أولاده مش حيحترموه، وحيسقط من نظرهم، ولو كان في أولاده بنات؛ البنت حتطلع كده زى أمها بالضبط، تشتتم، وتلعن جوزها برضه، وتبهدله، وماتحترمهاوش، وماكذبش المثل اللي بيقول: «أقلب القدرة على فمها تطلع البنت لأمها».

لو الأب كان كداب، وكذب مرة على مراته، والأولاد كانوا عارفين، ان هو بيكذب؛ همه كمان حيكذبوا، لما يكبروا، ويستحلوا الكذب. لو الأب اتحزم، ورقص، الأولاد حيعملوا نفس الشيء، لو الأب استسهل السب، واللعن، والشتيمة، همه كمان حيطلعوا على شاكلته، وحيسبوا، ويلعنوا، ويشتموا. ولو الأب عاكس جارتته، أو غازل الشغالة، قدام عيونهم، همه كمان لما يكبروا حيعملوا كده، وألعن من كده، لو الأب صلَّى؛ الأولاد حيصلُّوا، ولو الأب ماركعهاش، حيبقى صعب جدًا إنهم يواظبوا على الصلاة، لو الأب فطر في نهار رمضان؛ همه كمان مش حيصوموا زيه. الأب لازم يراعى كل حركة، وكل فعل، وكل همسة، وكل نظرة، وكل كلمة بتخرج منه، قدام عياله؛ لأنهم حيقلدوه، وحيطلعوا زيه بالضبط، «ومن شابه أباه فما ظلم» الأب لو كان صادق،

أمين، مهيب، وقور، ملتزم؛ ولاده كمان حيطلعوا على شاكلته، تمامًا،
والأم اللي بتقضى يومها خروج، ودخول، وقُعاد عند الجيران، وهاملة
بيتها، وعيالها؛ بنتها لما تكبر، حتطلع زيها كده، وألغن شويه، الأم اللي
حتلبس بدلة رقص، وتهز على واحدة ونص؛ بنتها حتعمل زيها كده،
بالضبط. ما نزرعه في الأبناء، نحصده، ومن زرع، وغرس خيرًا، حصد
خيرًا، ومن زرع، وغرس شرًا، حصد شرًا.

اصحوا العيالكم علشان ماتندموش.

بابا.. يا عيد



طبيعي جدًا، إنك تلعب مع طفلك، وتشاركه لعبته، وده حيكون من دواعى سروره، وفرحته؛ إنه يحس بمشاركتك، اياه فى كل شىء.

تبسط معه أحيانًا، أدخل البهجة على قلبه؛ مش عيب إنك تكون عيل، وتلعب بألعابه؛ ولما يجى يشبط فى لعبه، فى محل اللعب، لعبة معينة مثلاً، ويصر على شراؤها، ماتتضايقش منه؛ حتى لو أنت كنت شايف إنها عديمة النفع، وليست ذات قيمة، أو غالية الثمن، حدثه بهدوء، وأشرح له سبب رفضك لشرائها، ومزايا، وعيوب اللعبة، وأعرض عليه لعب أخرى، وفاضل بينها، وبين ما اختارها أمامه، وأشرح له مزاياها أيضًا، وبعد هذا، دعه هو يختار لعبته، بنفسه، لا تفرض عليه رأيك، ودعه يحدد، ويقرر هو بنفسه أى لعبة يشتري.

داعبه، لطفه، لا تتعالى عليه، ولا تتكبر، تبسط معه، وأمرح معه، فاللعب، والألعاب، تنمى ذكاء الطفل، فالرسول ﷺ كان يداعب أحفاده، ويحملهم على ظهره، وقد رآه الصحابة كثيرًا، ودخلوا عليه وهو يحمل الحسن، والحسين، على ظهره، ويسير بهما، ولم يتحرج، وهو رسول الله الكريم ﷺ.

مذكرات رئيس جمهورية عن ابنه وكيف كان يتعامل معه

الرئيس محمد نجيب

أول رئيس لجمهورية مصر العربية

(المذكرات تنشر لأول مرة)



الأبوه أبوه

مفيش فرق بين معاملة رئيس جمهورية لأبنه، وبين معاملة كَنَّاس «زبال» في الشارع، لأبنه، الاتنين أباء، والأبوه لغه متفق عليها، بين كل الذكور، مهما اختلفت لغاتهم، أو طبقاتهم، أو أعمالهم.

من مذكرات محمد نجيب، الرئيس الأسبق لمصر؛ عن علاقته بأبنه «فاروق»، يقول «محمد نجيب» في يومياته:

«فاروق» يطلب منى أن أنام على السرير، ووجهى للأسفل، قائلاً: نام يا حصان، ثم يركب على ظهري، ويقول: أقف يا حصان، ثم مرجحني يا حصان، فامرجه، ويكرر ذلك، وأنفذ أوامره، فيضحك ويلعب، ويكون في غاية السرور، ومن جهة أخرى فهي رياضة، لي، وله.

وتأتى في ذات المذكرات تحت عنوان: «عيد ميلاد فاروق الثانى»: اليوم الساعة ٩,٥٠ صباحاً، أتم «فاروق» الستين من عمره، مبروك يا عم «فاروق»، وأخذت له صورتين، فوتوغرافيتين، وأثناء ما كنت أكتب اسمه في الهامش، مسك القلم من يدي، وأغتصبه منى قائلاً: سيب، وكانت صورتاه ضمن ما عنده من اللعب، وعربته و٣ برتقالات، وكلبه «جيمى»، وكان مرتدياً البالطو الجديد، الكاكي ذا الياقة، والأكمام الأرجوانية، ولاعبته بعد الرسم، مدة بالسطوح، وهو

الآن جالس بجوارى، وأنا أكتب مذكراته هذه، طوله ٨٥ سنتى، لابسا حذاءه الصغير، ووزنه ١٥ كيلو جرام.

وتحت عنوان سوء الأخلاق، كتب الرئيس الراحل «محمد نجيب» عن «فاروق» ابنه ما يلى:

نظرًا لأن دادة فاروق، تجعله يختلط بالناس، فى الدكاكين، والشارع فتعلم منها أقبح الألفاظ، كقوله (يلعن أبوكى يا شر!!!!!! يا بنت الكلب) ورغما من زجره، مرارًا، وتوبيخ دادته، فلم يمتنع؛ ولذلك جربت طريقة الشطة، ويظهر أنها ناجحه، وعلى العموم، لاحظت إنه وعمره ستان ونصف، بدأ يتعلم الشقاوه، ولا يكفى نهره، أو زجره، والظاهر أنه يحتاج إلى شىء من الشدة، وربما الضرب، ولكنى لم أضربه، إلا مرة أو مرتين، على ما أتذكر.

وتحت عنوان: «تانى علقه» كتب «محمد نجيب»:

أخذ «فاروق» حمام فى المساء، ولم يشأ أن يترك الحوض، وأخذ يبكى، مُصرًا على البقاء فى الحمام، ولما أحضرناه ليبقى فى السرير، رفض البقاء، وحاول النزول، مستعملًا الصراخ، فقبضت عليه، وهددته بالحبس فى الغرفة المجاورة، فأزداد صراخًا، فأخذته إليها، ولما حاولت قفل الباب عليه تبغى، وحملته، ووضعته على ظهر صندوق كبير، عليه ملابس مغسولة، فأزداد صراخًا، فضربته على يديه بيدى فى ذراعه، من غيظى منه، ثم طلب إنزاله، فأرسلت إليه دادته «عائشة» لذلك، وتركته معها،

إلى أن انتهى وعاد لنا، وأخذ يلعب معها، وهذه تانى علقه فى حياته، فقد اضطرنى إلى ذلك، اضطرارًا؛ لأنى لاحظت سوء أخلاقه، واستعانتة بالصراخ، لكل صغيرة، وكبيرة، ويرجع ذلك إلى أن دادته تستسلم له، عندما يصرخ، ولا تعرف كيف تعامله؛ بأن تمتنع عن اعطائه ما يريد، إذا أستعان على ذلك بالصراخ.

وفى زيارة إلى حديقة الحيوان، يصف «محمد نجيب» تلك الزيارة قائلاً:

أخذت «فاروق»، ووالدته و«محمد» إلى حديقة الحيوان، وقضينا بها من الساعة ٣٠, ١٢ مساءً إلى ٤٥, ٣ مساءً، وتناولنا الغذاء هناك، بجوار حظيرة القردة، وشاهد «فاروق» مختلف الحيوانات، وأعجبه القروذ، ونوع من السنجاب الأوروبى، وكان يناولها الحمص، والفول السودانى، وأخذ يقلد سبع البحر، «كصوت الخروف»، وكان كلما قابل طفلًا لمسه، أو حسس على أفخذه، وساقيه، ومشى كثيرًا، وكان يلبس طربوش، ويمشى متماثلًا يمينه، ويسرة، وكان سروره عظيمًا، وكذلك أركبته «الدوكار» الذى يجره اثنان من السيسى ronles، كما اركبته سيسى مسرجًا، وشاهد الفيلة، والسباع، والذئاب، والتعالب، وغير ذلك، وكلما قابل «اتومبيل» واقف، وقف بجانبه، وأخذ يتحسسه، ويحاول فتح بابيه، ممسكًا الأوكرة قائلاً: أفتح، ثم عدنا من الحديقة إلى قصر النيل، بتاكسى بـ ١١ مليونًا، ثم ركبنا أتوبيس ١٤، إلى كوبرى

القبّة، ولكنه في الطريق أساء التصرف، بعدم الاستقرار، وضربني بيده، فأصبت به بمثلها، فكرر ضربته لي، فاضطرت إلى أن أنهره بشدة، وضربته بقسوة، على فخذه، فأنزعج، وسكت، ونام بعدها مباشرة، في الأتوبيس، ووصل بالنهار الساعة ٥ مساءً، بالضبط.

وتحت عنوان «حيله» يقول «محمد نجيب»:

اليوم أحضرت «فاروق»، ليحضر معنا تناول الغذاء، لتدريبه على آداب السفر، فقشر الموز، ووضع القشرة في الدورق، ولطشني قلمين، وبعد الغذاء، أراد ممارسة اللعبة اليومية، وهي الصعود على رأسى، ليشغل النور، ويطفئه، فأخبرته بأنه ممنوع من ذلك، نظير تعديه بالضرب علىّ، فأدرك خطأه، وبدأ يتملقني قائلاً: بابا حبيك .. تد .. أى .. بابا .. أنا حبيبيك .. تد، مصحوبه بطبطبه على صدرى، وقبله فأفهمته أنى لن أتنازل عن رأى، فأمتثل، وبعد قليل، حاول إعادة الكرة، فلما لم ينجح، أبتكر حيلة ظريفة، وهى أنه انتهاز فرصة تغييرى موضع رأسى (عند موضع القدمين)، فنام بجانبى، وتوسط ذراعى قليلاً، ثم تناول مخدته هو، وأحضرها إلىّ قائلاً: المخدة، أى خدها لتنام عليها، فأدركت حيلته، لأنه بعدها مباشرة نام على المخدة الأصلية، فقامت، ونمت بجواره، فما كان منه، إلا أن أسرع فى الصعود على رأسى، كالمعتاد قائلاً «نور بى ولع» أى أولع النور، وأطفئه، فتخلصت منه بصعوبه، فكانت هذه حيلة ظريفة، لجأ إليها تدل على ذكائه.

وتحت عنوان «ملخص لبعض خصاله، وتصرفاته» كتب الرئيس الراحل «محمد نجيب»:

«فاروق» الآن بصحة جيدة، وخطوده موردة، وقد كان سبب شدة تحفظ والدته عليه من البرد؛ أن أصيب بشيء من الحرارة، الجلدية، أظنها من لفح الحر، البسيط، وهو يستحم بدءاً من أمس، بالصابون الكبريت، ودهان الكبريت. «فاروق» كثير اللعب، ملأته حيوية، ونشاطاً، لا ينام نهاراً، إلا نادراً، وينام في هذا الشهر في الساعة ٧ مساءً تقريباً. أصبح الآن يحفظ كل كلمة يسمعا، ويكررها، فور أن يلتقطها، والحقيقة هو ذكى، نبيه، وعنيد، مما يشير بأنه سيكون شاباً، قوى الإرادة.. ويعتمد على نفسه كثيراً، يتكر ألعاب بنفسه، مع «جيمى» «كلبه الصغير الأبيض» الذى يحاول أحياناً أن يملأه، كما يملأ ما كينة الأتوبيل الصغير؛ وذلك بتدوير ذيله، حتى يصرخ ويستطيع «فاروق» الآن أن يملأ أوتومبيل صغير الحجم ٥, ١ مليم بالفتاح، ويلعب به لوحده، وهو مغرم بالدبة الصفراء النحاس، ويجاورها كثيراً، قائلاً لها: «لَبَّ» من فتحاته وشبابيكه الصغيرة، وغرامه شديد جداً بالجراموفون، أمس اسمعناه له كثير، وبقي ساكناً، وثابتاً فى السرير.

وتحت عنوان: «فاروق بمنتزه سراى القبة» كتب «محمد نجيب» يقول:

كانت الساعة ٤ مساءً، أخذت «فاروق» إلى منتزه سراى القبة، وبقي

هناك قرب الغروب، وكان مرحًا طوال الوقت، وتقابل هناك مع طفل رومى، سنه، سنه ونصف، فشاركه فى «بسكوته» وفى لعبه، وهى كرة صغيرة، ملونة، وعجلتين للدفع، فأراد اغتصابها منه، لولا وساطتى، وكان يجرى وهو فرح، طوال الوقت، وابقظ شخصًا نائمًا، فأزعجه، وكان كلما قابل طفل، دفعه بكلتا يديه، وفى ذلك روح المرح، مصحوبة بروح التعدى.

وتحت عنوان: «قرداتى» كتب «محمد نجيب»:

وجدنا بالمنتزه قرداتى، فتفرج «فاروق» على ألعاب القرد، وكان يصحبه مشيه على يديه، وحركات الانقلاب الجانبى، فيقف ضاحكًا، وكان يحاول مسك القرد، دون خوف، ودفعنا للقرداتى ٧ مليم، ثم عدنا للمنزل بالأتوبيس رقم ١٦.

وتحت عنوان «حلاقة» كتب «محمد نجيب»:

قبل وصولى المنزل، قصصت له شعر رأسه عند المزين؛ الذى بشارع كوبرى القبة، فلم يمانع كثيرًا، مع أنى كنت متخوفًا من عدم استقراره؛ إنما الظاهر أن السبب هو أنه تعب، من كثرة اللعب.

وتحت عنوان: «ظهور بثرة» كتب أيضًا «محمد نجيب»:

ظهرت بثرة بظهر يده اليمنى، وبجوارها خربشة القطة التى وصلتنا هذا الشهر، هى وأخرى، وثالثة، كان هذا يوم الخميس، أول أكتوبر، ثم جاء الجمعة، الحادى عشر من أكتوبر، واليوم الثانى، لتطور المرض.

وتحت عنوان «تورم»، ظهر ورم حول البثرة، ولكنه بسيط، أما السبت، وهو اليوم الثالث، كتب «محمد نجيب» «ازدياد الورم»، زاد الورم، وعرضناه على الدكتور «شوقى»، مع أخيه «على»، فقرر الدكتور، وضع مرهم «اكينول» أسود، ففعلنا، ولكن الورم مستمر. الأحد اليوم الرابع، استمر الورم فى الزيادة؛ رغم المرهم «الأكينول»، وعملنا له لبخة عيش فى الماء، عملية بسيطة، وخرجت بعد الإفطار، مساء لأحضار لبخة «انتى فلوجستين» «*unteflogustn*»، وقطرة «أرجدول»، فلما عدت نحو الساعة ٩, ١٥ مساء وجدت «فاروق» يبكى، والورم قد انتشر، حتى وصل إلى ذراعة الأيمن، وأمه منزعجة، فخشيت أن يكون هذا تسمماً، أو من أثر سقوطه، فأخذه إلى المستشفى، «الندى» بالأتمبيل، وهناك عملنا له عملية، فتح بظهر يده اليمنى، بواسطة الدكتور الملازم «عز الدين أشرف»، وشاهدت بيده قطعان، أحدهما بين السبابة والإبهام، والآخر بين البنصر والخنصر، وكان شكل القطع مؤلماً، فكادت يغمى علىّ، وشعرت بدوخة.

وتحت عنوان: «عودة قصيرة لمصر» كتب «محمد نجيب»:

عدت من معزلة وادى النظرون، فى المساء، وكان فرح «فاروق» عظيماً، وأحضرت له معى لعب، فيها عدد ٢ فيل، وكاوتشوك، وشخشيخة، أوتوموصيفى، كدة، ٣ لعبة أورجان صغيرة، ثلاثة أطباق أحمر، أخضر للشوربة، أصفر، وكباية مياه حمراء ب ٣ ملليم، والأطباق ٥، ٦، ٥ وشيكولاته، ستين قرش، هى مجموع مشروعاتى «لفاروق».

إن شاء الله لأ



إن شاء الله .. لأ.

زمان، وأنا صغير، كنت كل ما أطلب من والدتي حاجة؛ أى حاجة،
كانت تقول لى: إن شاء الله.

كنت لما أسألها، وأقول لها: إنتى مش هتوديني جنينة الحيوانات؟
ترد عليا، وتقول لى: إن شاء الله.. إنتى مش ناوية تشتري لى عجلة؟ ترد
وتقول لى: إن شاء الله .. إنتى مش هتشرتى لى مجلة ميكى؟ ترد برضه
وتقول لى: إن شاء الله.

لما زهقتنى من كلمة إن شاء الله دى.

وكنت أنا بعقل، وتفكير العيال الصغيرة، استننى على كلامها؛ أنى
أروح جنينة الحيوانات، لكن للأسف، كنت بستنى كثير، وفى الآخر،
مابتودنيش. وكنت بقعد أستنى العجلة، اللى أنا ياما طلبتها، وحلمت
بيها، وللأسف العجلة ما كانتش بتيجي، ولآ حتى مجلة ميكى، اللى
كانت أيامها بخمسة وعشرين قرش، على ما أذكر، يجوز أيامها، كان
مبلغ الخمسة وعشرين قرش ده كثير، أو صعب، إن أم تضحى بيه،
فى حاجة هايفة، زى مجلة، فيها شوية صور، ورسومات ملونة؛ ده من
وجهة نظرها هى تقريبًا، مع إننا كنا ناس ميسورين الحال.

المهم ما كانش فيه حاجه بطلبها، من والدتي، وتقول لي فيها إن شاء الله، إلا وكانت الحاجة دي مابتجيش، وما بتتحققش، وما بتحصلش، وكنت أقعد أقول كده مع نفسي، هو فيه إيه؟ هي مشيئة الله، مش عايزة تيجي ليه؟

وكنت أروح لوالدتي، أسألها هي الحاجة اللي أنا طلبتها منك، ماجتش لحد دلوقتي ليه؟ ترد، وتقول لي: ربنا سهل، إن شاء الله، تيجي.

وأستني تاني، وأصبر تاني، وأنتم طبعًا عارفين إن العيال الصغيرة، ملهاش في الصبر، وطولة البال، والكلام ده خالص، وكنت أفضل مستني تساهيل ربنا، بس يظهر إن تساهيل ربنا ما كانتش بتيجي، مع أمي أبدًا، وأرجع لها تاني، تقول لي: لما ربنا يريد، هاجيبلك اللي أنت عاوزة، وأفضل مستني من تاني - تاني إيه؟ قولوا عاشر - إرادة ربنا، وبرضة ربنا ما كانش بيريد. وأنا لأنى صغير، ما كنتش عارف إن الإرادة هنا، مش إرادة ربنا، دي إرادة أمي - وطبعًا كل شيء بإرادة ربنا في الأول، وفي الآخر - أمي هي اللي ما كانتش ليها إرادة، وهي اللي كانت مش عاوزة تجيب لي حاجه، وأنا ما كنتش عارف الكلام ده، لحد ما رحنت زعقت، وقولت لها: أنا زهقت، مش عاوز ربنا سهل، ومش عاوز ربنا يريد، ومش عاوز إن شاء الله، ومش عاوز حاجه خالص.

أمي عملت عداوة، بيني وبين ربنا؛ من غير ما تاخذ بالها، لأن كل اللي بحلم بيه، كعيل صغير، وعاوزه كان متوقف على ربنا، وربنا مش

عاوز يحقق أى شىء، من أحلامى؛ اللى هى أحلام، طفل صغير، ومش
عاوز يجيب لى طلباتى؛ اللى هى برضه طلبات، ورغبات طفل صغير..
كنت أقعد أقول لى نفسى: هو ما فيش حاجة أعوزها، ربنا يرضى يحققها
لى؟ هو ربنا مش بيحبني كده ليه؟ هو ربنا مستقصدنى ليه؟

مخ عيال بقى، مش فاهم حاجه. شوفتوا أمى وصلتنى لإيه؟

كنت أقعد أسأل نفسى، طب إشمعنى ربنا بيسهل لصحابى،
وجيرانى، اللى من سنى، ويجيب لهم عجل، وكور وأنا لأ؟، كده ربنا
مش شرير معاهم، ده شرير معايا أنا بس، ليه؟ يبقى كده فيه حاجة
غلط، ويبقى أنا وحش، ولأ ربنا هو اللى وحش؟

وجريت على والدى، وسألته: هو ربنا فين؟

استغرب والدى من السؤال بتاعى، وابتسم وقال لى: ليه بتسأل

السؤال ده؟

■ أنت عاوز منه حاجة؟

■ قلت له: قول لى بس الأوّل ربنا فين؟ وأنا أجابوك.

■ شاور لى بصوباعة، لفوق وقال لى: ربنا هنا فى السما.

■ سألته: هى السما دى بعيدة؟

■ رد وقال لى: أيوه بعيدة.

■ قلت له: خلاص كده أنا فهمت.

■ وسألني: فهمت إيه؟

■ قلت له: فهمت ليه طلباتي دايماً بتتأخر، وما بتجيش.

■ قال لي: هو أنت طلبت حاجة من ربنا، وربنا ما بعتهاش؟

قلت له: أنا ما طلبتش من ربنا حاجة، أنا طلبت من ماما، وماما قالت لي: إن شاء الله، وربنا يسهل، ولما يريد ربنا، وما فيش حاجة من اللي أنا طلبتها جات، أو ربنا بعتهالي.

ضحك والدي، وقال لي: طيب ما تجرب، تطلب أنت من ربنا، اللي أنت عاوزه، وما تخلّيش حد يطلب لك حاجتك، ما تخلّيش فيه واسطة، بينك وبين ربنا، ربنا ما يحبش الوسائط.

■ قلت له: هو ربنا بيسمع كلام العيال الصغيرة؟

أبتسم والدي وقال لي: طبعاً، ده ربنا بيسمع كلام العيال الصغيرة، قبل كلام الكبار، لأن الأطفال أحباب الله. بس أنت متزعلهوش.

■ قلت له: والله يا بابا أنا مش بزعله، أنا بشرب اللبن كل يوم، من ساعة ما ماما قالت لي: إن ربنا ما يحبش الأولاد اللي ما يشرّبوش اللبن، وما بضربش القطة بتاعتني، وبأكلها، وبشربها، هي كمان اللبن، ومش برضى أنيمها على الأرض، وبنيّمها معايا، على السرير.

رد والدى وقال لى: كده خلاص، ربنا مش هيزعل منك أبدًا.

وبعقل عيل صغير، قعدت أفكر، وقلت فى بالى، بقى كده ربنا مش زعلان منى أنا، ده أكيد زعلان من ماما؛ علشان مايجبش الحاجات اللى هى بتطلبها منه، علشان ماما مش بتشرب اللين، أنا على طول بشوفها، بتشرب شاي، يبقى ده اللى مزعل ربنا منها.

خلاص.. طالما ربنا فى السما، أنا هطلب الحاجات دى منه بنفسى، ومن يومها، بقيت أشرب كوباية اللبن فى البلكونة؛ علشان ربنا يشوفنى، وأنا بشربها، وماما كانت تقعد تزعق، وتقول لى: ماتشربش كوباية اللبن كده قدام الناس، خش أشربها فى الأوضة، أحسن حد يبص لك فيها، وتشرق، أو يحسدوك - كانت بتخاف من الحسد - وأنا كنت برفض أسمع كلامها، لأنى كنت فاكر إنى لو شربتها فى الأوضة، ربنا مش هيشوفنى، وأنا بشربها، وكنت أقعد أقول لنفسى، أنا لازم أشرب كوباية اللبن قدام ربنا - كنت فاكر إن سقف الأوضة، بيحجب الرؤية بينى وبين ربنا، وبيحول بينه وبين إنه يشوفنى - وكنت بضطر أشرب الكوباية بسرعة، قبل ما ماما تأخذها منى، أو تدخلنى الأوضة، بالعافية، وكنت بعد ما أشربها، أبص لفوق، فى السما وأقول: والنبي يا رب، ابعت لى الحاجات، اللى أنا عايزها، أهه أنا بشرب اللبن، وبسمع كلامك، ومش بكذب، ومش بشتم حد، ولا بفتن على حد، وكمان اللى بيعمل لى حاجة تزعلنى، بقول له: الله يسامحك. والنبي يا رب، ماتأخرش عليا طلباتى، وكنت

بفضل على دا الحال، مستنى، وأنام، وأقوم من النوم، ألف الشقة كلها،
وأقعد أدور على العجلة، والكورة، والمجلة، وما كتش بلاقيهم، وأقعد
زعلان، وأجيب كوياية لبن تانية، وتالته، ورابعة، وأطلع أشربهم، فى
البلكونة، وأكلمه، وأستنى، وبرضه، ما فيش فايده.

قلت فى نفسى هى إيه الحكاية؟ هو ربنا زعلان من الناس كلها؟
ورحت لوالدى، وقلت له: إنى زعلان من ربنا، وشرحت له إن ربنا
رافض إنه بيعت لى أى حاجة، من عنده، وسألنى والدى، أنت طلبت
من ربنا إيه؟ وهو ما بعتهوش؟ قلت له كورة، وعجلة، ومجلة، رد
والدى وقال لى: بص يا حبيبي، ما ينفعش إنك تطلب من ربنا بطيخة؟
وتستنى إنه ينزهاالك فى سبت، من السماء، قلت له: هو ربنا معندوش
حبل طويل؟ رد وقال لى: لأ.. ربنا عنده كل حاجة، بس المفروض أنت
لما تعوز حاجة من ربنا، تطلبها منى أنا، قلت له ليه، هو أنت ربنا؟
ضحك، وقال لى: لأ أنا بابا، مش ربنا، قلت له: أنت قلت لى إن ربنا
ما بيعبش الوسائط، وأنا مش عايزك واسطة، بينى وبينه؛ لأن ربنا مش
هيسمع كلامك؛ علشان أنت بتشرب شاي، زى ماما، وكمان سجاير،
ومش بشوفك وأنت بتشرب لبن خالص، أنا زهقت.

وجريت من قدام والدى، وقعدت أعيط، وجرى والدى ورايا،
وهدّانى، وفهمنى إن الصغار بيشرّبوا اللبن، والكبار بيشرّبوا شاي،
وفهمنى إن ربنا هيبعت له هو الفلوس، وهو اللى هيشترى لى كل اللى

أنا عاوزه، وبرضه سألته ساعتها، هو ربنا هيبعت لك الفلوس في سبت برضه؟ وطبعًا كنت أنا بأسئلتى دى، وصلت والدى لمرحلة الزهق منى، رغم طولة باله، اللى كانت أطول من طولة بال والدتى؛ وعلشان ينهى المأساة دى، رد وقال لى: لأ مش هيبعتهم في سبت؛ هيبعتهم لى في جواب، وصدقته، لأنه والدى، ودايمًا الطفل بيصدق والده.

وفضلت مستنى الجواب ده، وكل ما يجى البوسطجى، أفرح، وأستنى بابا يقول لى، إن ربنا بعت له الجواب، اللى فيه الفلوس، وبابا ما كانش بيقول لى حاجة، بخصوص جواب ربنا ده خالص، وكنت بقعد أفتش الجوابات، وأفتح الأظرف، وأدور فيها، على الفلوس، وما كنتش بلاقى أى فلوس، في الجوابات.

وزهقت، وجريت على والدى سألته عن سبب تأخير الجواب، اللى فيه الفلوس، ورد والدى وقال لى: الجواب هيجى، هيجى، بس هيتأخر شوية؛ علشان المسافة طويلة، وبعيدة أوى، بينا وبين ربنا، وما صدقتش والدى، وحسيت لأول مرة إنه بيكذب عليا، وشكيت فيه، وقلت في نفسى، أكيد ربنا بعت الجواب اللى فيه الفلوس، وبابا خدهم، وإداهم لماما، وهى صرفتهم، لإنى كنت دايمًا بشوفها، بتاخذ الفلوس من بابا، وتنزل السوق تصرفها، وتجيّب بيها أكل، وترجع.

وهدانى تفكيرى، إنى أسأل البوسطجى بنفسى، وأول ما شوفته سألته، هو أنت يا عمو ماجبتش جواب لبابا، من عند ربنا

فيه فلوس؟ وضحك عليا البوسطجى، طبعًا وقال ده عقل عيال صغيرة، وقال لى: لأ.. لسه ماجبتش الجواب، اللى فيه الفلوس. ووصيته إنه أول ما يجيب الجواب ده؛ اللى فيه الفلوس، يبقى يقول لى، والبوسطجى وعدنى، وقال لى: حاضر أول ما يوصل الجواب ده هقول لك، على طول.

وكنت كل ما تصادف، وأشوفه، أو هو يشوفنى بيتسم، ويقول لى من غير ما أسأله: لسه الجواب ما جاش. وبعد مدة طويلة، البوسطجى ده مشى، ومارجعش تانى، وجه واحد جديد عليا، ما أعرفهوش، رحت سألته، وقلت له هو فين عمو، صاحبك اللى كان بيحيب الجوابات قبل منك، رد البوسطجى، وقال لى: ده راح عند ربنا - كان يقصد إنه مات، وأنا ما فهمتش - وفرحت ساعتها، وقلت ده راجل طيب، لما ربنا مابعتش الجواب، راح بنفسه علشان يجيبهولى، مش خسارة فيه كده الملابس، اللى كنت بديهوله، كل ما أشوفه.

وفضلت مستنى البوسطجى، اللى راح عند ربنا؛ يجيب الجواب إنه يجى، ومعاها الجواب اللى فيه الفلوس، وفضلت مستنى لحد سنة خامسة ابتدائى، لحد ما صحيت من النوم لقيت «الكورة الكفر» اللى قعدت مستنيها أربع سنين، محطوطة جنبى على سريرى، وعرفت إن بابا بعتهالى من السعودية، لأنه كان سافر يشتغل هناك.

مش معايا انتم إن الجواب اللى أنا استنيته، ده أتأخر كثير أوى، لأن

أيامها ما كانش فيه بريد سريع، ولا (DHL)، وطبعًا طول المسافة من السما للأرض، كانت عائق في وصول الجواب، بسرعة.

ولحد النهاردة الجواب ده ما جاش، ولا البوسطجى رجع، من عند ربنا، يجوز المواصلات فوق زحمة، والتوك توك، لسه ما وصلش فوق.

طبعًا مش معقول أكون أنا في السن ده، لسه فاكر الحكاية دى بالتفصيل كده، صعب طبعًا، بس والدى، كتر خيريه لما كبرت، كان بيقعد يشرح لى، ويحكيلي، أنا قد إيه كنت طفل مزعج، بأسئلتى الكثيرة، وقد إيه أنا كنت بتعبه معايا، لأنى دائمًا؛ على حد قوله، ما كنتش بقتنع بكلامه، ولا بكلام والدتى، فى ردهم على أسئلتى. وعرفت منه إن سبب عدم إتيان العجلة، هو خوفهم عليا من الوقوع بيها، أو محاولة نزولى بيها الشارع.

إيه رأيكم؟ كان ليا جق ما أقتنعش بكلامهم، وأنا صغير ولا لأ؟ انتم مش معايا إن أجوبتهم على أسئلتى كانت غير منطقية، وتودى فى داهية، أمى خلتنى أكره جملة «إن شاء الله»؛ اللى كانت كل شوية تقولها لى، لما أطلب منها طلب، أو حاجة، والطلب ده ما كانش بيتحقق، لأن هى كانت رافضة من جواها، تحقيقه؛ لشيء فى نفسها، مش عايزة تصارحنى بيه، مع إنى شايف إن الصراحة، والحقيقة كانت هتبقى أفضل بكثير، من اللى عملوه فيا، تسويق، وكذب، ومماطلة، وحكايات مغلوطة.

كرهتنى أمى، من غير ما تاخذ بالها، أو تحس بالذنب، فى جملة إن شاء الله، وعملت لى عقدة منها، بقيت بعد كده كل ما أطلب حاجة

من حد، ويقول لى إن شاء الله، أقول إن ده كداب، وإن الحاجة دى مش ممكن هتحصل، وهو مش هيعملها، ومش هتيجى، أو إن الشخص ده بيسوفنى، وبيأطلنى؛ لحد ما أزهدق، أو حتى أصرف نظر عنها، بقيت بكره كل اللى يقول لى: إن شاء الله، ويعرف على طول أنه إنسان كداب، وجبان، وما عندوش الشجاعة الكافية، إنه يقول لى إنه مش هيعمل الحاجة دى، أو مش هينفع يعملها.

سبحان الله، بقت جملة إن شاء الله مهرب، وحبج بعض الناس، الذين يستخدمونها، علشان يهربوا من تنفيذ شىء معين؛ لشخص ما، وكل اللى حصل عند الناس دول، أنهم ربطوا مشيئتهم، بمشيئة ربنا، علشان يسوفوا بعض، ويتهربوا من بعض، أصل الناس دول متعودوش على الصراحة، اتعودوا على الكذب، والنفاق.

المهم ما علينا، مش ده موضوعنا، موضوعنا هو الأطفال، أحباب الله، وعلاقة الآباء، والأمهات بأبنائهم، وتربيتهم، تربية خاطئة، وغرس مفاهيم، ومعتقدات مغلوطة، ضارين عرض الحائط، بالحكمة الشهيرة «التعلم فى الصغر كالنقش فى الحجر»، يعنى اللى بيتعلمه الإنسان منا وهو صغير؛ صعب محوه، أو إزالته من عقله، بسهولة.

كلنا كبرنا، وإحنا جوانا مفاهيم مغلوطة، كلنا كبرنا، ومعانا أسئلة أجوبتها، غير صحيحة، وأسئلة مالهش إجابات، من أصله، ومن أساسه، كلنا كبرنا، وادر كنا، أن أهالينا كانوا بيكذبوا علينا وإحنا

صغيرين، وما كانوا يبصارحونا بالحقيقة، كانوا غير صادقين، يجوز ما حدش علمهم، يجوز ما حدش فهمهم، يجوز ما حدش وعآهم، همه كمان ما هممش ذنب، في اللي حصل فينا، واللى عملوه معانا؛ من غير ما يقصدوا، أو من غير ما يكونوا مدركين، إنهم غلطوا في حقنا.

ولأن الأبناء يسيرون، على درب الآباء، جاوبنا أطفالنا بنفس الطريقة؛ اللي أهالينا جاوبوا بيها على أسئلتنا زمان، وهربنا من إجابة بعض الأسئلة، زى ما همة هربوا من إجابتنا زمان، علمونا الهروب، والمغالطة، والاستسهال، وتكبير الدماغ، وإحنا بنفذ دة، مع أطفالنا، وأولادنا، وده غلطنا، ويا ريت نقدر نصصح الغلط ده.

يا ترى ممكن يجي اليوم، اللي يربى فيه كل أب، وأم، أبنة، أو بنته تربية سليمة، وينشئه، تنشئة صالحة، ليه ولأولاده، من بعده؟ والجيل الجديد، المفروض يكون أفضل من جيلنا، وجيل آبائنا، طيب هيجى مين اليوم ده؟ وما فيش حد فينا، مهتم، جازم المختصين بتربية الطفل، وعلم نفس الطفل، وتنشئة الطفل، ألفوا كتب زى الأساليب القويمة، في أصول التربية، والنشأة السليمة، لكن فين الأب، والأم اللي بيعلموا أولادهم، ويربوهم، من خلال الكتب؟ إحنا مش مجتمع متحضر للدرجة دي؛ ولسه ما وصلناش للمرحلة دي، ده غير إن الكتب دي، مش رخيصة، وغالية، ومهلكة لميزانية الأسر البسيطة، محدودة الدخل، مش هنقول معدومة الدخل.

إحنا محتاجين حاجة أكبر من الكتاب، وأرخص منه، حاجة أقوى

من التأثير، وأسهل في التعليم، والتحصيل، محتاجين حاجة ببلاش كده،
دمها خفيف، مش ثقيلة، شيقة، وجذابة، مش كلام «مخلص»، في كتب
دكاترة «كفكاويين» - نسبة إلى كافكا -.

هيبقى ما فيش قدامنا غير التلفزيون، برنامج تلفزيوني، يتم إعداده
إعداد جيد، من قبل تربويين، ودارسين لعلم نفس الطفل، وليس من قبل
هواة، أو صحفيين، يكون البرنامج ده عبارة عن مواقف، أو تمثيلات،
مضمونها إرشادي، تثقيفي، تعليمي للآباء، وليس للأبناء، هدفه لا يقل
عن هدف برنامج «سر الأرض»، على شاكلته، كده بالضبط، ويقوم
بأدائه، وتمثيله، فنانيين، محبوبين لدى العامة، وليس فنانيين «كومبارس»،
أو فنانيين درجة تالته؛ حتى لا ينفض الآباء، والأمهات من حول
البرنامج، وأن يراعى في مواعيد إذاعته، ومشاهدته، حتى لا يبث في
فترات العمل، مع التنسيق، مع باقى القنوات التلفزيونية الأخرى، وأن
يعرض على قناة معينة، في وقت لا يوجد فيه على القنوات الأخرى،
برنامج آخر؛ يحرص على مشاهدته جمهور عريض؛ حتى لا يترك هذا
البرنامج الإرشادي، التثقيفي للآباء، وتحوّل المحطة، لمحطة أخرى؛ تبث
برنامج آخر، أكثر جماهيرية، وحضور، وكذلك عدم عرض الأفلام
المحببة في وقت هذا البرنامج، على قنوات أخرى، أو عدم بثه في أوقات
تكون فيها جميع القنوات، بجميع برامجها، عديمة المشاهدة، والاهتمام من
جمهور المشاهدين، مع مراعاة التنوية عن البرنامج، مرارًا، وتكرارًا، حتى
يلفت التنوية، الانتباه إليه.

برنامج زى ده، هيكون مفيد جدًا، لتربية جيل جديد، فاهم، واعى
ليس معقد، برنامج هيعلم الآباء، والأمهات، كيفية الإجابة على أسئلة
أبنائهم، إجابة صحيحة، بس ربنا يستر، وما يجيبوش واحد يقعدوه على
كرسى، يقعد يدى الآباء، والأمهات، إرشادات، ونصائح، ومواعظ،
زى اعملوا كده، وما تعملوش كده، وسووا إيه، وما تسووش إيه، لأن
المصريين، ما يجيبوش طريقة النصيح، والإرشاد، والمواعظ فى التعليم.

طبعا كلنا عارفين الأسئلة اللى الآباء، والأمهات بيهربوا منها،
وبيجاوبوا أبنائهم عليها؛ إجابات غير منطقية، زى أنا جيت منين يا بابا؟
أو يا ماما؟ وتكون الإجابة المعتادة: إحنا اشتريناك من «السوبر ماركت»،
أو من السوق يا حبيبى، أو إحنا لقيناك على باب جامع، أو إحنا جيناك
من عند الدكتور... وسؤال هو ربنا فين؟ وشكله إيه؟ وتكون الإجابة
ربنا فى السماء، وشكله: ﴿لَيْسَ كَمِثْلِهِ شَيْءٌ﴾ [الشورى: ١١].

أظن برنامج زى ده، هيكون مفيد، وحيوى، وبشوية إعلانات،
ودعاية، مصر كلها هستناه؛ علشان تفرج عليه، وممكن التلفزيون
المصرى، يكسب من ورا الإعلانات اللى هتدخله، كثير، وممكن البرنامج
ده يكون على شكل، مسلسل كوميدى؛ عبارة عن أسرتين، مختلفتين
تمام الاختلاف، أسرة رشيدة، وواعية، ومثقفة، وأسرة على النقيض،
مع إظهار تربية، ومعاملة كل أسرة لأبنائها، مع مراعاة مراحلهم
العمرية، ودرجة استيعابهم، وإدراكهم، وتفهمهم، وأسرة أخرى
بتجاوب إجابات خاطئة، مغلوطة، غير منطقية، وأحياناً بتهرب من

إجابات الأسئلة، المطروحة من الأبناء، مع إظهار مدى تأثير الإجابات، الصحيحة، والخاطئة على عقول، وتصرفات أبناء الأسرتين، وتكوين مداركهم، وهكذا.. والباقي على المعد، أو كاتب السيناريو.

دى فكرتى، فكرة البرنامج، اللى بحلم أشوفه فى التلفزيون المصرى، وأتمنى يحى اليوم، اللى يتم إعداده، وتنفيذه، وبثه، يمكن ساعتها، الواحد يراجع نفسه من تانى، ويرجع يتفرج، ويتابع برامج التلفزيون المصرى؛ اللى الناس انفضت من حوله.

بس أمانة، اللى يعمل البرنامج ده، يخلى عنده ضمير، وينوه إن الفكرة دى، من كتاب «بابا يا عيل»، أو إن الفكرة دى لفلان الفلانى، وحلال عليه، إعداد البرنامج، والله يسهل له، ويسهل للمصريين كلهم.

أنا مش عارف أركز معاكم خالص، الواد ابنى الصغير «مازن» عمال يزن على دماغى، زى الدبور .. عاوز «اسكوتر» يا بابا، عاوز «اسكوتر»، عاوز حوض سمك، عاوز حوض سمك.

وأنا عمال أزقه بعيد عن أوراقي، وأقول له: إن شاء الله، هجيب لك اللى أنت عاوزه. إن شاء الله، بس سيبنى، أكمل شغلى..

إيه ده؟ الواد بيصرخ بصوت عالى، ويقول لى:

ما تقولش إن شاء الله يا بابا.. ما تقولش إن شاء الله..

إن شاء الله لأ..... إن شاء الله لأ.

بجيب في .. وما الجيبش فغيش



كلنا وإحنا صغيرين، كنا بنبص لأمنا، بصّة احترام، وتقدير، وكنا بنتابعها، ونراقبها صبيان، وبنات، وهى بتتعامل مع الناس، والجيران، والقرايب، والوالد، والأغراب، وكنا بنتعلم منها طريقة المعاملة؛ معاملة كل الناس... كنا بنشوفها وهى بتصلى، فروض ربنا، الفرض بفرضه، مع الآذان، لا قبله، ولا بعده، كانت تقوم قى فجر الشتا، فى عز البرد، تتوضأ؛ علشان صلاة الفجر.. كنا بنشوف حرصها على تغطية شعرها، وهى خارجة من البيت، محتشمة.. وحرصها إن أكلنا، وطعامنا، يكون جاهز قبل ما نرجع، من مدارسنا، وقبل الوالد ما يرجع هو كمان، من شغله.. وحرصها على نظافة البيت، ونظامه، وهدوءه، وحثنا على الكلام، بصوت واطى؛ علشان ما يسببش أى إزعاج، للغير.. كانت حريصة على حاجات حلوة، وجميلة، كنا بنكبر قدامها، يوم عن يوم، وهى كمان كانت من أفعالها، بتكبر فى عيننا، يوم عن يوم.

وكنا لما نتجمع، قدام شاشة التلفزيون، وتصادف، ويكون التلفزيون عارض فيلم عربى، فيه بعض المناظر الخارجة؛ بعقولنا، ومفاهيمنا زمان، زى مثلاً بوسة، طويلة، سخنة من بتوع «محمود ياسين» أيام شبابه، وسوالفه الطويلة، لشفاييف «نجلاء فتحى»، أو بوسة عالية أوى، من بتوع «حسين فهمى» لشفاييف «ميرفت أمين» أو «سهير رمزى»، أو بوسة شقية، من «حسن يوسف» لـ «ناهد شريف»؛ كانت الأم الفاضلة دى، تقوم،

وتسحب بهدوء، من مجلسنا، وقعدتنا، وتدارى وشها؛ علشان ماتشوفش
الى بيحصل، وكان تعليقها دايماً، على البوس، والأحضان، فى الأفلام
المصرية: «دى مسخرة، وقلة أدب»، دول بيعلموا الولاد، البوظان.

وإحنا فى اللحظات دى، كنا بنهرب بعيننا، من عنينا، ونظراتها،
ونضحك، من تحت لتحت، بصوت مكتوم، مش ظاهر، ونكمل فرجة،
على الفيلم، وما كُنَّا بنشتم نفسنا، إلا لما تقوم، وتسيننا لوحدنا، نتفرج
براحتنا، من غير تدمر، ولا تعليقات، من النوعية إياها بتاعة: «جيل
فسدان»، و«جيل بايظ»، و«عيال آخر زمن»، و«اهه دقنى لو فلحتوا»،
و«الله ما انتم نافعين»، و«اخص عليكم».

تصدقوا.. عمر الواحد منا، ما شاف أمه لابسة قميص نوم، من
بتاع ستات دلوقتى، أو حاجة خليعة، حتى فى البيت، فى أوضة نومها،
أو شافها، حطة أحمر شفايف، أو أحمر حدود، كان كبيرها، لبخة على
راسها، ولما نسألها إيه دى يا ماما؟.. كانت تقول؛ حنة.

لدرجة إن الواحد، لما كبر شوية، وعرف يعنى إيه جواز، وخلفة، وعيال،
وعرف عملية الإنجاب، بتحصل إزاي، ومنين، وعن طريق إيه، بقى الواحد
منا يضرب كف، على كف، ويقول بقى الست دى، اللى عاملة زى الراجل،
اللى ناقصة شنب، الست دى، اللى عاملة زى عسكري المرور، وحكمदार
السجن، عملت كده؟ لا.. ده مش معقول. بس مش معقول إزاي؟ طب لو
مش معقول، طب إحنا جينا منين؟ إيه.. جينا مع الحمام الزاجل؟

وما كانش الواحد منا مصدق، فيها كده، رغم إنه لا عيب، ولا حرام، بس كنا مش مصدقينه، عليها. ما كانش الموضوع ده راكب فى دماغنا، خالص، كنا أنا، وأخويا، قلاات الأدب، نقعد نقول: ده أكيد أبونا خدها المستشفى، وأدّوها «بنج» وعملوا لها عملية تخدير، قبل اللي بالى بالكم، لأننا ما كُنّا مصدقين، إنها ممكن تكون فى وعيها، وتوافق على كده من شدتها، وحزمها، بس باين إن المواضيع دى، ما فيهاش حزم خالص، ولا ضبط، ولا ربط، أصل بينى وبينكم، الست الوالدة كانت شديدة حبتين، ثلاثة، ودماغها أنشف من «الدوم» الأسوانى، وعلى طول معترضة، وتشجب، وتترم، وتتذمر، وده حلو، وده وحش، وده يصح، وده ما يصحش، وده عيب، وده غلط، وده، وده، وده، وألف وده، وده بقى غير الزعيق، والشخط، والنظر فينا، والذعر، والتوعد، والتهديد، والقمع، والكبت، والتسلط، والاستبداد، كانت بصريح العبارة، موريانا العين الحمرة، موريانا الويل، وكنا بنخاف منها، وبنعمل لها ألف حساب، وحساب، وجبر، وهندسة كمان، كانت موريانا النجوم فى عز الظهر، كانت زى «أما الغولة»، اللي بيخوفوا بيها العيال الصغيرة فى حواديت الجدة.

ما فيش لعب فى الشارع، ما فيش سهر بالليل، ما فيش فرجة على التلفزيون؛ إلا يوم الخميس؛ علشان يكون صابح أجازة، ما فيش مرواح عند صاحب، ولا مذاكرة مع صاحب، الأصحاب بتبوظ بعض، وبتفسد أخلاق بعض، ما فيش ركوب عجل، ما فيش حاجة

إسمها طيارة ورق، ما فيش بمب، ولا فيه صواريخ، ما فيش بيات برة البيت، عند أى حد كان، قريب، أو غريب، ما فيش أكل من الشارع، أكل الشارع مش مأمون، ولا مضمون، أكل الشارع رمرمة، ووجع بطن، على الفاضى، ما فيش أحسن من أكل البيت، ما فيش زعيق، ما فيش دوشة، ما فيش كذب، ما فيش غلط، ما فيش شتيمة، ما فيش أخ يهدد أخوه، إنه هيفتن عليه؛ لو عمل حاجة غلط، الفتنة حرام، وبتدخل النار، ما فيش حد يمد إيده ياخذ فلوس من قريب، أو غريب؛ حتى لو هو عزم عليكم، وألح بإصرار، ده مرفوض نهائى، ما فيش حاجة اسمها عيدية، حتى فى الأعياد، المبدأ مبدأ، والمبدأ واحد، مش بيتجزأ، ما فيش حد يعمل أى شىء، إلا بإذن، ما فيش غياب من المدرسة، لأى سبب كان، ما فيش رحلات مدرسية، ما فيش قُعاد على سلم العمارة، ولا فيه طلوع فوق السطح، ولا فيه وقوف فى البلكونة، ولا فى الشباك، ما فيش حد يلعب، أو ينكش فى أغراضها، أو أغراض الوالد، ما فيش حد ياكل، وما يغسلش إيده قبل الأكل، وبعده؛ علشان «الشهامة» ماتشمهوش، وهو نايم، ما فيش راديو، ولا فيه كاسيت، ما فيش حد يبص من ورا الشيش، على الناس علشان عيب، وحرام أى حد يسألك على حاجة بتحصل فى البيت، قول ما أعرفش، ممنوع فتح باب الشقة، وإحنا مش موجودين، لأى شخص كان، كل واحد لازم يغسل رجليه، وسنانه، قبل ما يطلع ينام على السرير، اللى يشرب فى كوباية يغسلها، لكن الأطباق سيوها فى الحوض، ما حدش يغضب على الأكل،

ما حدش يقول ده حلو، وده وحش، كله نعمة ربنا، ونعمة ربنا حلوة،
 ما حدش يذاكر على السرير، علشان النوم مايكبش عليه، المذاكرة
 تكون على المكتب، ما حدش يصرخ، أو يعيط فى الحمام؛ علشان حرام،
 ومش مستحبه، ما حدش يطلب فلوس مننا، فى وجود ناس فى البيت،
 (ضيوف)، لما الكبار يتكلموا، الصغيرين ما يتدخلوش فى الكلام، اللي
 أبص له بعينى، يسيب المكان، ويمشى على طول..

كان ناقص عليها تقول لنا: مافيش حد فيكم يتنفس إلا بإذن،
 كانت كل حاجة بالنسبة لنا ما فيش، كرهتنا فى كلمة «مافيش»، وحبينا
 غصب عننا، ومن غير ما نحس، كلمة «فى»، كانت عاملة لنا نوع من
 القهر، والكبت..

كانت قمعانا.

نسيت أقول لكم، ده كمان، ما فيش قعاد مع الضيوف، وما
 فيش حاجة اسمها: أنا سمعت، زى ما يكون الواحد المفروض إنه
 مايسمعش، يكون أطرش، ولو فرض وسمع، مايتكلمش، مايحكىش،
 ومايقولش اللي سمعه، يعنى يبقى كمان أخرس، بالعربى القصيح كده،
 ما فيش حاجة اسمها، نقل للكلام المسموع.

ولو فرضنا، وسمحت لنا نلعب شوية، فى يوم الأجازة، يبقى اللعب
 داخل نطاق حجرة نومنا، أو حجرة حياتنا، لأن الحجرة دى كنا بنعمل
 فيها كل حاجة، ما نخرجش منها؛ إلا لما نروح المدرسة بس، وبعدين

نرجع لها تانى، كانت دنيتنا كلها فى الأوضة دى، أكل، وشرب، ونوم، ومذاكرة، ولعب، بس بشرط اللعب يكون بهدوء، عمركم شوفتوا ولاد صغيرة، بتلعب بهدوء؟ أهو إحنا كنا بنلعب بهدوء، كنا بنوشوش بعض، كنا بنقعد نلعب، (بنك السعادة)، و(بنك الحظ)، وبنبنى بيوت بالمكعبات؛ علشان الألعاب دى، ما فيهاش دوشة، ولا صوت، أما الكوتشينة، فكانت بالنسبة للوالدة لعبة مكروهة، ومن المحرمات، لكن كان فيه إذن بلعب، الشطرنج، والطاولة، تم السماح بيها فى حركة «يسقط الاستبداد»، بعد سنين.

باختصار، أمنا صادرت طفولتنا، وشقاوتنا، وحرمتنا نكون أطفال، لا فيه حاجة اسمها «حديقة الحيوان»، ولا حاجة اسمها «السيرك القومى»، ولا حاجة اسمها «الملاهى»، ولا حاجة اسمها «نادى»، و«حمام سباحة» علشان الغرق؛ زى ما يكون كل اللى بينزلوا حمام السباحة بيغرقوا، وما بيطلعوش تانى، ولا فيه حاجة اسمها «مراجيح»؛ حتى فى الأعياد، كنا بنشوف الأولاد، اللى فى سننا فرحانين، و«مزقطين»، والفرحة باينة فى عيونهم، وهمه بيلعبوا؛ وخاصة فى الأعياد؛ بالمراجيح، والعجل المتزوق، بكرانيش الورق، الملون، والدانتيل، والبمب، والصواريخ، وإحنا لأ، إحنا نتفرج بس، ده الحق الوحيد، اللى سمحت لنا بيه الست ماما، حق الفرجة، حق المشاهدة، حق الحسرة، حق الألم، حق الحرمان.

دى مش بعيد، لو كانت عرفت إن إحنا بنحلم، وإحنا نايمين، إننا

بنلعب كورة؛ كانت حاسبتنا على حلمنا ده، وعاقبتنا عليه، لأن إحنا لعبنا من غير اذن منها، في الحلم، وخصوصًا إننا لعبنا، لعبة هي خطأها في قائمة المنوعات، والمحرمات، أكيد كنا هنتضرب، علقه سخنة، أو كان كل واحد فينا هيتسكع له صفعه على وشه.. النوم عندنا كان بالإكراه، ولازم تغمض عينك، عكس شعار حملة «روتانا» اللي بتقول: «مش هتقدر تغمض عينك»، وإحنا ما كُنَّا نكره في حياتنا، قد نوم الظهر، وإحنا صغيرين.

كانت أم صعبة، ولما كان حد من قرابيننا، أو جيراننا، يقول لها حرام عليكى، فكى، عن العيال شوية، كانت ترد، وتقول: لأ لازم الأولاد يطلعوا متربيين، كويس، ومؤدبين، ويبسمعوا الكلام، كانت تقول لهم: اللعب في الشارع وحش، ويبجيب المشاكل، والاختلاط يفسد الأخلاق. الناس كانت ترد، وتقول لها: دول صبيان، مش بنات! كانت تقول: ما فيش حاجة اسمها صبيان، وحاجة اسمها بنات، فيه حاجة اسمها أولاد، وتربية؛ وتعليم، وبس.

ساعتها كنت بقول في نفسى، الحمد لله إن إحنا ما عندناش أخت بنت، كانت أكيد عملت فيها أكثر من اللي بتعمله فينا، ومعانا، وأكيد البنت دى، كانت هتدلق على نفسها جاز، وتولع في نفسها؛ من كتر الخنقة بتاعة أمى، كانت أم خنيقة، وحمدت ربنا كثير على عدم وجود بنت لأمى، رغم إنه كان حلم شخصى، إنه يكون عندى أخت، زى بقية

أصحابي، وزملائي، لكن ربنا ما أرادش، إن الحلم ده يتحقق، كانت أم صعبة، كانت مشكلة.

أنا فاكر إنه كان ممنوع علينا نقل أى حاجه من أثاث الشقة، من مكانها؛ اللي هي اختارتهوله، لمكان تانى، إحنا شايفينه أفضل، من وجهة نظرنا، ما فيش حاجة عندها اسمها وجهة نظر، وجهة النظر، عند غيرها بتكون قصر نظر منه، ووجهة النظر عندها بتكون بُعد نظر منها.

ويا ويله، ويا سواد نهاره، وليلة، منا اللي يكسر طبق، أو كوباية، أو طفاية، أو فاظة، أو برواز صورة، كان يقعد يعيط ساعة؛ قبل ما هي تعاقبه، خوفًا من العقاب. ده بقى غير أن اللي ما ياكلش كويس، تيجى الممرضة، البيت علشان تديله، إبرة فيتامين. دى كانت أيام طين.

كانت مربيانا، بالحديد، والنار.. الكلمة كلمتها، والشورى شورتها، والرأى رأيها، كانت بالنسبة لنا «سى السيد»، «البعبع» بتاعنا، لدرجة إنى فاكر إنى كنت ساعات بقوم من نومى، مفزوع، وخايف، ومرعوب، وبشر عرق، من خوفى، كنت بشوفها فى حلمى، داخله عليه الأوضة، ناكشة شعرها، ومبرقه عينيها؛ علشان تعاقبنى، كنت بنام، وأغطى وشى، فى عز الحر، من الخوف، والرعب.

وعلى العكس منها كان الوالد، إنسان طيب جدًا، لأبعد درجة، ومدى، ممكن أى إنسان يتصوره، عمره ما ضرب حد فينا، عمره ما مد يده علينا، عمره ما شخط فينا، أو زعق لحد فينا.. فكر كم كانت سياسة

بينهم هما الاتنين، هى تشد، وهو يرخى؟ .. ما أظنش؛ لأن والدى ما كنش ليه فى السياسة؛ زى كده بالضبط؛ كان دايمًا هو ووالدى، فى شجار دائم، ومشاكل، وعدم وفاق، بسبب السهر، والسفر المفاجئ له، ومأموريات الشغل - وكله شغل - بس كان هو لينا الحنان، والأمان، والعطف، كنا نقعد أنا، وأخويا نقول لبعض، وإحنا صغيرين: هو ما لقاش غير الست دى، اللى يتجوزها، هو ما كانش قادر يتجوز لنا واحدة طيبة غيرها دى مطهقانا فى عشيتنا وموريانا الويل.

سبحان الله، لما أطفال صغيرين، فى ابتدائى، يشوفوا أمهم مش طيبة، ويشوفوها شريرة، وبعبع.

يا ترى ما كانتش بتحبنا؟ ما أظنش فيه أم بتكره ولادها؛ والدليل على كده، إنه أول ما كان حد فينا بيعيا، أو تحصل له حاجة، أو يصيبه مكروه.. شوية برد مثلاً، أو انفلونزا، أو كحة، أو حصبة، أو غدة، أو حتى شوية مغص، كانت تقعد تعيط، وتبكى، وزعلها كان بيكون واضح، وباين عليها، من خوفها علينا، وكان اهتمامها بيزيد بينا، لكن أول ما التعب يروح، ونتعافى، كانت بترجع زى الأول، وألعن، زى ما تكون خائفة إننا نصدق، أو نحس، إنها طيبة، أو حنينة، هى كانت رافضة إحساسنا ده، كانت رافضة، إننا نشوف ضعفها، حتى لمشاعرها، وشوية الحنية، والحنان، والطيبة، بتوع أيام المرض، كانت بتعوضهم بشوية شدة، وحزم، وممنوعات زيادة فى القائمة - قائمة الممنوعات - لدرجة إن الواحد منا كان

ساعات بيتعايا، علشان يستدر عطفها، ويشوف حنانها ... حيرتنا معاها
بنت الأيه!

ولما كبرت، كنت أسأل نفسي: يا ترى أهلها ربّوها بنفس الطريقة،
اللى هى مُصرّة تربينا بيها دى، أنا وأخويا؟، ولما سألت خالاتى عن
تربيتها، اتضح العكس، إنها كانت أصغر أخواتها، وكانت حبيبة أبوها،
وطلباتها دايماً كلها مجابة، بالعربى الفصيح، كانت مرفهة، ومدلعة،
ومدلة، بقيت أسأل نفسي إيه الحكاية بالضبط؟ أيه سر المعاملة الشديدة،
والقاسية دى؟ جات منين؟ وهى بتعمل معانا كده ليه؟ وقلت: يمكن
أهلها غصبوا عليها، وجوزوها الوالد بالعافية، والإكراه، وهى مش
بتحبه، علشان كده هى قاسية معانا. ودى برضه طلعت غلط، لإنى
عرفت إنها أتجوزت والدى، بإرادتها، وبدون غضب، أو إجبار، وفضلته
عن غيره، كثير اتقدموا لخطبتها؛ لأن الوالد ما كانش فيه حد فى الدنيا،
ممكن يكرهه؛ لأنه كان أطيب، وأحن، من الدنيا، والأيام لما بتدى.

ولما كبرت أكثر، ودخلت الجامعة، ودرست علم نفس، حاولت
أفسر السر فى تربيتها لينا بالقسوة دى، على ضوء ما درست، لكن
للأسف ما قدرتش أوصل لشيء، ونسيت الموضوع ده نهائى، وده اللى
أنا ظنيت، بس اتضح لى بعد كده، إن الموضوع ده ما اتنساش بالمرّة، ولا
ممكن يتنسى، ده طلع جوايا، ومعايا، ما بيفارقنيش، لحظة واحدة.

الكبت اتحول لانفجار، وثورة على حاجات كثير، وأوضاع كثير،

أولها كلمة مافيش، وثانيها كلمة لأ، وبطلت أقول كلمة حاضر، وطيب، ونعم، كان الوحيد اللي أنا بسمع كلامه، لما كبرت هو والدى، والدى بس، رغم إنى كنت دايمًا زعلان منه؛ لأنه هو اللي سمح لوالدتى، إنها تربينا بالطريقة دى، حتى لو كان فى قرارة نفسه معترض، على طريقته فى تربيتنا، كان هيفيد بآيه اعتراضه؟ طالما ما أتحوّلش من جواه لبراه، فى صورة، وشكل حازم، وموقف إيجابى.

ولكن والدتى، لما كبرت عمرى ما سمعت كلامها، كنت بضرب بكلامها عرض الحائط؛ وكأنى ما سمعتهاوش من أصله، كان بيخش من الودن اليمين، ويطلع من الودن الشمال؛ من غير ما يعدى على العقل، أو خلايا التفكير، فى المخ. يجوز لو كانت علمتنى احترامها، أكثر من إنى أخاف منها، كنت سمعت كلامها، من قبيل الاحترام؛ مش من قبيل الخوف، لكن هى علمتنى أخاف منها، ولأنى أول ما اتمردت على الخوف؛ على خوفى؛ ما بقتش أخاف منها، أو أسمع حتى كلامها، حتى لو كان كلامها ده صح، ومش غلط، وفى النافع، مش فى الضار، وفيه مصلحتى، كنت بركب دماغى، واعمل اللي أنا عايزه؛ حتى لو ما كنتش من جوايا عايزه، بس كنت بعمله، لأنه عكس اللي هى عايزاه.. العند، والانفجار، ونهاية القمع، والكبت، يعملوا أكثر من كده.

وركبت دماغى، وركبت عجل، وأنا كبير، واطلمت سواقته على كبر، وكنت بسوقه بسرعة، زى المجنون، اللي داخل سباق الدراجات،

وقدّام العربيات، والأتوبيسات، كنت بسوقه بغل، وانتقام من العجلة، اللي ياما انحرمت منها، ومن رفض أمى، إني اركبها؛ من خوفها عليا، إني أقع بيها، وتنكسر إيدي، أو رجلى، أو عربية تخبطنى، ما كانش هاعمى الخطر، اللي كنت فيه، كان كل اللي هاعمى الانتقام، وإنى أعمل الشىء، اللي اتحرمت منه، والممنوع دائماً مرغوب، الموت فى تحقيق الغاية؛ كان أفضل عندى، من الحياة بدون إعاشة، الحياة فى كبت، وقمع، حياة عايش فيها متفرج بس، زى الجمهور فى السينما، ودور العرض، اللي بيتفرج على فيلم، ومش قادر يغير فيه شىء، بيتفرج عليه زى ما هو، وبس، متفرج فقط، كرهت الفرجة، وحببت أدخل فى أحداث الفيلم، ما كانش مهم عندى أكون البطل، كان كفاية إنى أكون أحد الأدوار، أو يكون ليا أحد الأدوار، فى الفيلم، وأشارك فى أحداثه، كان شىء مهم عندى أكون من صنّاعة، وليس مستهلكيه.

اشترت بمب، وكنت بطلع أفرقه، من فوق السطوح، ومش بمبة واحدة، بمبة!، لأ.. كنت بفرق كيس «البمب»، كله اللي جواه ١٠٠ «بمبة»، مرة واحدة، وكان صوته مقلق، ومفزع، وبيخض الناس؛ لأنه لما كان بيفرق، كان بيبقى عامل زى القنبلة، أو كاوتش عربية، فرق فجأة، وما كانش فى الحسبان خوف الناس، أو خضتهم. ما كنتش بعمل لها أى حساب.

اشترت طيارة ورق مرة، ما عملتهاش زى غيرى، من الأولاد، لأنى ما اتعودتش زيهم أعملها، وأنا صغير، اشتريتها جاهزة، وأنا فى

الجامعة، وطلعت طيرتها، من فوق السطوح، وكانت كل ما تبعد،
أسيب لها الخيط، أكثر، وأكثر من إيدى، علشان تعلق أكثر، وأكثر،
وكان حجمها بيقل فى نظرى، وكل ما تطلع فوق أكثر، وأكثر، كنت
برضى بطلوعها لفوق أوى، شىء جوايا، قديم، من طفولتى.

رحت الملاهى، وركبت كل ألعابها، ورحت حديقة الحيوان،
ولقيت فيها لحد ما رجليا اتكسرت، مرة واتنين، وتلاتة، وعشرة.

الحاجة الوحيدة اللى ما رحتهاش، لحد النهاردة هى السيرك،
ومسرح العرايس، بس هيجى يوم، وأروحهم، طلعت البرج، ودخلت
الهرم من جوه..

كل اللى أمى حرمتنى منه، وأنا صغير؛ عملته، وأنا كبير، لدرحة إن
زمايلى فى الجامعة، كانوا ببصوا عليا، ويضحكوا، ويقولوا لى: كفاية
لعب، هو أنت محروم؟ ولأ أنت ما لعبتش، وأنت صغير زينا؟ كنت
ببص لهم، وابتسم، وأضحك من قلبى، وأقول لهم: حاجة زى كده
بالضبط، ومش هريحكم.

كانوا معذورين، زمايلى فى الجامعة، وجيرانى فى الشارع، وأصحابى،
ماهمه مش عارفين حاجة، ومش فاهمين حاجة، مش عارفين إنى اتحرمت
من طفولتى، وأنا صغير، اتحرمت من حقى، فى إنى ألعب، زى غيرى؛
زى أقرانى؛ زى باقى الأطفال.

وكسرت في الشقة أطباق، وأكواب، وطفائيات، وفازات، بعدد شعر راسي، وأنا كبير عامداً، متعمداً، وكنت بزعل لما كوباية تقع من إيدي، غصب عني، وتنكسر، كنت بكرهاها - الكوباية اللي وقعت - وأقول يا خسارة، كان نفسي أكسرها بنفسي، عامد، متعمد، مش هي تنكسر غصب عني، كنت بحس إنها بكسرها كده، حرمتني متعة جوايا؛ متعة الانتقام.

نقلت عفش، وأثاث البيت كله، من مكانه، وغيرت نظامه، وحطيته في أماكن تانية، أنا شوفتها أفضل، من وجهة نظري؛ وجهة نظري، أنا. صاحبت ناس كثير، كويسة، ومش كويسة، ناس ليها لزمة، وناس مالهش أي لزمة، صاحبت ناس بيئة، وناس «مودرن»، صاحبت دكاترة، وبتوع «دوكو» سيارات، وسمكرية، وعفشجية، صاحبت بلطجية، وناس ما تتصاحبش، من أساسه، زرت كل قرابي؛ حتى قرايب الدرجة العاشرة، سهرت طول الليل، ونمت وش الصبح..

كنت بعمل كل الحاجات دي، من غير تفكير، كنت عاوز أعملها وخلص، كنت عاوز أعمل كل اللي اتحرمت منه، وأنا صغير، واتفرض إنني أعمله، كنت بزعم، وأصرخ، لمجرد الصراخ، لا أكثر، وأتكلم بصوت عالي، في البيت، وأعمل دوشة، وإزعاج، وأفتح باب الثلاجة، وأرزعة؛ لحد ما يطرقع، من جراء اصطكاك الكاوتش في بعضه؛ لأنني اتضربت، وأنا صغير بسبب رزعة باب الثلاجة، ووقفت على السلام،

وفى البلكونة، والشباك، عاكست البنات، جيرانا بالساعات، ركبت ديول ورق، لأغلب ضيوفنا، وللمدرسين فى الفصل، فى ثانوى، ما حدش زارنا مهما كانت درجة وقاره، وهيبته، ونزل من عندنا من غير ديل ورق، أنا علقتھوله فى بنطلونه، من ورا، والى ما كانتش أعرف أعلق له ديل؛ كنت بحط ورقه، على ضهره، مكتوب فيها أنا حمار، أو أصل البعيد حمار، وكان أى حد يشوف كده، يعرف أن الشخص ده، نازل من عندى، كسرت الدكك، وإزاز شبابيك الفصل، وركبت ديول، لكل زمايلى فى الفصل، وعملت فيهم مقالب، ما يعلم بيها إلا ربنا، وزوغت من المدرسة، ونطيت من على سورها؛ رغم إنى كنت من المتفوقين، ودخلت سينمات، مالهاش عدد، كنت بشوف الفيلم حفلتين، ورا بعض؛ وكأنى كنت داخل أذاكره، وأحفظه؛ مش أتفرج عليه.

الأساتذة فى ثانوى ياسوا منى، ومن تصرفاتى، وكتبوا لى استدعاء، عشرين ألف مرة، لولى الأمر، ما كنتش طالب ثانوى؛ كنت حالة، على حد قولهم - ذكية جداً، متفوقة جداً، عنيدة جداً، تصرفاتها، وأفعالها غير مبررة، بالمره، ولا تخضع للمقاييس النفسية، والاجتماعية، المتعارف عليها - حولونى منازل - كنت أصغر طالب فى لجنة المنازل، بيمتحن فيها، غششت اللجنة بحالها، كل اللجنة نجحت، فى الثانوية العامة، ودخلنا كلنا مرحلة أولى، تجارة، وحقوق، وآداب، وألسن، وتربية، ودار علوم، وإعلام، كنا كلنا أدبى.

كفاية عليكم كده دلوقتي.

باختصار عملت كل حاجة، تخطر في بالكم، وما تخطرش على بالكم، لكن لما حاولت أكذب، وأغش، وأأذى الناس، ما عرفتش، حاولت وماعرفتش، لأنى ما اتعودتش على كده، من صغرى.. وفى اللحظة دى احترمت أمى؛ لأنها هى اللى علمتنى إنى ما اكذبش، وأقول الحق، ولو على رقبتى، علمتنى ما أغشش، وما أذيش الناس.

وهديت ثورتى، وقدرت أنام، وأعيش، لأنى فعلاً ما كنتش بعرف أنام، كل ما أفكر إزاي الواحد منا يكره أمه؟ وإزاي أمه توصله للدرجة دى؟ فى إنه يكرهها، ولما عرفت، واناأكدت إنها رغم قسوتها عليا، فادتنى، ونفعتنى، لما غرست جوايا حب الناس، كل الناس، وعدم أذيتهم، وعلمتنى إنى ما أكذبش، وما أخدعش، وما أغشش أبداً.. احترمتها، ولقيت نفسى بنسى كل شىء؛ كل شىء، وحش، هى عملته معايا، بنسى قسوتها، وتسلطها، واستبدادها، وجبروتها، ولقيت نفسى بحبها، بحبها من أول وجديد.

وعرفت، واناأكدت إن ما فيش حد بيكره أمه؛ مهما عذبتة، وعملت فيه، ومهما أهانتة، وقست عليه، وما فيش أم بتكره ابنها.. ومش مهم بفضل فاكرين، مش مهم ننسى، المهم نحاول ننسى، وأكيد هتنسى.

أعمال المؤلف

كتب:

١- «رئيس جمهورية نفسى»

طبعة أولى، المؤلف، يناير ٢٠٠٩.

طبعة ثانية، المؤلف، فبراير ٢٠٠٩.

طبعة ثالثة، سفنكس للفنون والآداب، يوليو ٢٠٠٩.

طبعة رابعة، سفنكس للفنون والآداب، يوليو ٢٠١٠.

٢- «ظظ فيكم»

طبعة أولى، دار العلوم للنشر والتوزيع، يونيو ٢٠٠٩.

طبعة ثانية، دار العلوم للنشر والتوزيع، أغسطس ٢٠٠٩.

طبعة ثالثة، دار العلوم للنشر والتوزيع، يناير ٢٠١٠.

٣- «حمرا»

طبعة أولى، شمس للنشر والإعلام، أغسطس ٢٠٠٩.

طبعة ثانية، شمس للنشر والإعلام، يناير ٢٠١٠.

طبعة ثالثة، كنوز للنشر والتوزيع، سبتمبر ٢٠١٠.

٤- «مصر على موجه كوميدى»

طبعة أولى، شمس للنشر والإعلام، يناير ٢٠١٠.

٥- «أمك اسمها حنفي»

طبعة أولى، دار القمر، يناير ٢٠١٠.

طبعة ثانية، دار القمر، يناير ٢٠١٠.

٦- «مصر فيها فيل»

طبعة أولى، مكتبة مدبولي، يناير ٢٠١١.

٧- «دولة بابا»

طبعة أولى، أطلس للنشر والتوزيع، يناير ٢٠١١.

٨- «الفنكوش»

طبعة أولى، أطلس للنشر والتوزيع، يناير ٢٠١١.

٩- «المكنة طلعت قماش»

طبعة أولى، كتابي للطباعة والنشر والتوزيع، مايو ٢٠١١.

١٠- «من أنتم»:

طبعة أولى، كتابي للطباعة والنشر والتوزيع، يونيو ٢٠١١.

طبعة ثانية، كتابي للطباعة والنشر والتوزيع، يوليو ٢٠١١.

طبعة ثالثة، كتابي للطباعة والنشر والتوزيع، نوفمبر ٢٠١١.

طبعة رابعة، كتابي للطباعة والنشر والتوزيع، ودار الشافي،

ودار الوليد ليبيبا، طبعة مشتركة، يناير ٢٠١٢.

- طبعة خامسة، كتابي للطباعة والنشر والتوزيع، ودار الشافي،
و دار الوليد، ليبيا، طبعة مشتركة، يناير ٢٠١٢.
- ١١ - «أنا شامم ريجه وحشه (ثقافة عموم المراهيض)»
طبعة أولى، مكتبة زهراء الشرق، نوفمبر ٢٠١١.
- ١٢ - «لامؤاخذه كيف تعرف انك حمار»
طبعة أولى، مكتبة زهراء الشرق، نوفمبر ٢٠١١.
- ١٣ - «أنا حركب دقن وأروح لأبوكي»
طبعة أولى، نفرو للنشر والتوزيع، يناير ٢٠١٢.
- ١٤ - «خوازيق»
طبعة أولى، مكتبة زهراء الشرق، يناير ٢٠١٢.
- ١٥ - «كوهين ينعي ولده ويصلح ساعات»
طبعة أولى، مكتبة زهراء الشرق، يناير ٢٠١٢.
- ١٦ - «أتوبيس ١٣ (الأجرة موحده): مجموعة قصصية»
طبعة أولى، الدار المصرية للنشر، يناير ٢٠١٢.
- ١٧ - «عم شكشك (دولة العجائز)»
تحت الطبع، مكتبة زهراء الشرق.

١٨ - «عثمانه من السودانه»

تحت الطبع، مكتبة زهراء الشرق.

١٩ - «الجوازه باظت»

تحت الطبع، مكتبة زهراء الشرق.

٢٠ - «جده الرياض رايح جاى»

تحت الطبع، مكتبة زهراء الشرق.

٢١ - «عائلة سعوديه جدًا»

تحت الطبع، مكتبة زهراء الشرق،

برامج تليفزيونية

كتابة فكرة برنامج حمراء، وأفكار حلقاته الثلاثون؛ لقناة موجه

كوميدى - رمضان ٢٠١٠.

البريد الإلكتروني:

e.mail: ehab.taher13@ymail.com

Tel : 01280993310